

四庫全書

史部

欽定四庫全書

史部

蜀中廣記卷

五十九至  
六十一

詳校官編修

臣

翟梈

編修

臣

程嘉謨覆勘

總校官燕吉士

臣何思鈞

校對官學正

臣陳木

謄錄舉人

臣曹勲祖

欽定四庫全書

蜀中廣記卷五十九

明 曹學佺 撰

方物記第一

鳥

嚴君平道德指歸云羽者翔虛而神鳳王之揚子雲草  
玄夢吐白鳳子玄上蓋鳳有文章而神明者不易見之  
物也予讀山海經曰都廣之野鸞鳥歌焉則鳳在蜀中

已見之矣北周書武帝天和之年渠州上言鳳凰集于  
楓樹羣鳥列侍者以萬數又唐書天福七年六月鳳凰  
見萬歲縣即今之開縣也水經註云越巂郡之廢葉榆  
縣有鳥弔山山上有鳥千百羣飛其會時嗚呼啁哳歲  
必一度大集云鳳凰死於此

雲笈七籤云雲頂山鐵像天尊是則天朝濛陽匠人廖  
元立所鑄初鑄時有紫雲如城其上吐五色以捧日衆  
共瞻禮間忽有靈鶴數隻引一大鳥翼廣丈餘通身赤

色其形如鳳衆鶴繞鑪盤旋嘹唳相應大鳥飛勢迅疾  
徑入鑪中忽起火焰高三五十丈其聲如雷邈迤屬天  
迸散流溢直遍山上衆皆奔駭已聞異香之氣彌日方  
散

朝野僉載劔南彭蜀間有鳥大如指五色畢具有冠似  
鳳食桐花每桐結花即來花落即去不知何之俗謂之  
桐花鳳極馴善止於婦人釵上客終席不飛人愛之無  
所害也寰宇記云桐花色白至春有小鳥色蕉紅翠碧

相間生花中惟飲其汁不食他物花落遂死人以蜜水  
飲之或得三四日性多跳擲抵觸便死土人畫桐花鳳  
扇卽此也按桐花鳳扇唐李衛公有賦矣瑯嬛記云桐  
花鳳小于玄鳥春暮來集桐花一名收香倒掛又名探  
花使性馴好集美人釵上出成都疑卽東坡詞所謂綠  
毛么鳳名倒掛卽唐僧隱巒詩五色毛成比鳳雛深藏  
花裏只如無美人買得偏憐惜移向金釵重幾銖劉言  
史題蜀客楊生亭云垂絲蜀客涕沾衣歲盡長沙未得

歸腸斷錦城風日好可憐桐鳥出花飛李之儀阮郎歸  
詞詠倒掛云朱唇玉羽下蓬萊佳時近早梅探花情味  
久安排枝頭開未開魂欲斷恨難裁香心休見猜果知  
何遜是仙才何妨入夢來宋祁贊云金花之露俗曰鳳  
類綠羽纖爪藻背翠尾花落則隱以是見貴

益州方物略云紅桐嘴出永康軍山谷中絳體若赭惟  
羽間差黑人亦蓄之然不能久也贊曰絳質剛喙辱黑  
于衿因網就羈亦馴厥心

又云護花鳥青城峨眉間往往有之至春則啼其音若  
云無偷花果髣髴人言贊曰酋首黑裳黃駁其羽厥鳴  
嚶嚶若禁若護名而不情盜者猶懼

又云百舌鳥出蜀山谷間毛采翠碧蜀人多蓄之一名  
翠碧鳥善效他禽語凡數十種非東方所謂反舌無聲  
者往往亦矜鬪至死不解然捕者告罕故惜之不使極  
其擊云贊曰綠衣紺尾一啼百轉可樊而蓄爲世嘉玩  
拾遺記曰吳黃龍元年越雋之南獻背明鳥止不向明

巢常對北多肉少毛聲音百變聞鐘磬笙竽之聲則奮翅搖頭時人以爲吉瑞及遷都建業吳人語訛呼背明爲背亡鳥國中以爲大妖不及百年當有喪亂滅亡之事果如斯言

爾雅雋周燕子雋鳥出蜀中說文云蜀王望帝化爲子雋今謂之子規也師曠禽經云江左曰子規蜀右曰杜宇甌越曰怨鳥又云杜鵑出蜀中狀如雀鷄而色慘黑赤口有小冠春暮即鳴夜啼達旦鳴必向北至夏尤甚

晝夜不止其聲哀切田家候之以興農事惟食蟲蠹不能爲巢居他巢生子冬月則藏蟄矣揚雄蜀記曰望帝杜宇者蓋天精也稱王時荊州有人化從井中出名曰黿靈於楚身死屍反汴流上至汶山之陽忽復生乃見望帝立以爲相其後巫山龍鬬壅江不流蜀民墊溺黿靈乃鑿巫山開三峽降丘宅土民得陸居蜀人住江南羌住城北始立木柵周三十里令黿靈爲刺史號曰西州後數歲望帝以其功高遂禪位焉號開明氏望帝脩

道處西山而隱化爲杜鵑鳥或云化爲杜宇鳥亦曰子  
規鳥至春則啼聞者悽惻焉酉陽雜俎以杜鵑知陽相  
推而鳴先鳴者吐血死初鳴時先聽者主離別瑯嬛記  
昔有人飲于錦城謝氏其女窺而悅之客聞子規啼心  
動即謝去女恨甚後聞子規啼則怔忡若豹鳴也使侍  
女以竹枝驅之曰豹汝尚敢至此啼乎故名子規爲謝  
豹亦主離別也宋鮑照擬行路難詩愁思忽而至跨馬  
出北門舉頭四顧望但見松栢園荆棘鬱蹲蹲中有一

鳥名杜鵑言是古時蜀帝魂聲音哀苦鳴不息羽毛憔悴似人髭飛走樹間啄蟲蟻豈憶往日天子尊念此死生變化非常理中心惻愴不能言杜甫詩君不見昔日蜀天子化爲杜鵑似老烏寄巢生子不自啄羣鳥至今爲哺雛雖同君臣有舊禮骨肉滿眼身羈孤業工竄伏深樹裏四月五月偏號呼其聲哀痛口流血所訴何事常區區爾豈摧殘始發憤羞帶羽翮傷形愚蒼天變化誰料得萬事反覆何所無萬事反覆何所無豈憶當殿

羣臣趨溫庾筠詩蜀魄千年尚怨誰  
聲啼血向花枝  
滿山明月東風夜正是愁人不寐時  
羅隱詩銅梁路遠  
草青青此恨那堪枕上聽  
一種有冤猶可報不如銜石  
疊滄溟陸龜蒙詩碧竿微露月玲瓏  
謝豹傷心獨叫風  
高處已應聞滴血  
山榴一夜幾枝紅  
又蜀客春城聞蜀  
鳥思歸聲引未歸心  
那知夜夜愁相似  
爾正啼時我正  
吟胡曾詩杜宇曾爲蜀帝王  
化禽飛去舊城荒  
年年來  
叫桃花月似向春風訴國亡

鷓鴣蜀夔州郡皆有之宋布衣陸士規入蜀詩云東風吹草綠萋萋路入黃陵古廟西帝子不知春又去亂山無主鷓鴣啼

揚雄賦有鷓鴣註云伯勞也蜀童謠有陽雀叫鷓鴣笑之語一名鷓音鴣蜀中名駕鷓滇中名酢油郎好掠人冠巾衆鳥畏之俗又名鳳凰卑隸性好獨易緯鷓必單栖樂府東飛伯勞皆一物曹植惡鳥論云昔尹吉甫用後妻譖殺其子伯奇後悟悲傷出遊于田有鳥鳴于桑

聲殷然吉甫動心曰伯勞乎是吾子棲吾與伯勞尋聲而棲于蓋吉甫乃射殺後妻以謝之故俗惡伯勞鳴言所鳴之家必有尸也

錄異記王蜀刑部侍郎李仁表將入貢春官時薛能尚書爲鎮先繕所業詩五十篇以爲贄濡翰成軸於小亭凭几閱之未三五首有戴勝自簷飛入立於案几之上馴狎良久伸頸譚翼而舞向人若將語久之又轉又舞如是者三超然飛去翼日投詩薛大加禮待以其子妻

之

爾雅曰鷄大者蜀蜀子鷄郭璞注曰蜀今蜀鷄也鷄鷄子名廣雅云辟鷄鷄也杜艾季蜀皆鷄名

禽經云吐綬鷄出巴峽山中人多蓄玩大如家鷄小者如鴿鷄頭頰似雉羽色多黑雜以黃白圓點如真珠斑項有素囊內藏肉綬常時不見每春夏晴明則向日擺之項上先出兩翠角二寸許乃徐舒其領下之綬長潤近尺紅碧相間采色煥爛踰時悉斂不見或剖而視之

一無所覩此鳥生亦反哺行則避草木亦謂之避株鳥  
按食物本草謂之吐錦鷄古今注謂之錦囊蔡氏詩話  
謂之真珠鷄倦游錄謂之孝鳥詩經謂之旨鷃巴邛有  
旨鷃是矣

墨莊漫錄云中官陳彥和言宣和中掌禽苑見蜀中貢  
一鳥狀如鷺色紺翠尾甚多而長飛則尾開裊裊如雙  
旗其名曰王母老杜立都壇歌王母晝下雲旗翻即此  
山海經曰岷山其鳥多鷮鷮郭註云鷮白鷮赤汲冢王

會云巴人以比翼鳥蜀人以文翰文翰者若臯鷄註爾雅云翰天鷄赤羽也文若翬雉一名鷩風周成王時蜀人獻之

蜀都賦蝮蜺山栖註鳥名也如今之所謂山鷄其雄色斑雌色黑出巴東郡按華陽國志孟獲激其屬反曰官欲蝮腦三斗即此物也

西京雜記成帝時越舊獻長鳴鷄伺鷄晨即下漏驗之晷刻無差每鳴則一食頃不絕長距善鬪

蜀都賦碧鷄儵忽而曜儀地理志曰碧鷄在越嶲青蛉  
縣禺同山漢宣帝時方士言益州有碧鷄神可以醮祭  
而致也使諫議大夫王褒持節往求之褒道病竟不能  
致成都有碧鷄坊蓋祠所也老杜詩時出碧鷄坊其後  
西川校書薛濤營宅于碧鷄坊老焉

漢書元始元年正月王莽白太后下詔以白雉薦宗廟  
蓋莽風益州令塞外蠻夷所獻也

災祥志云蜀建興九年十月江陽至江州有鳥從江南

飛渡江北不能達墮水死者以千數是時諸葛亮連年  
動衆志吞中夏而終死渭南所圖不遂又諸將分爭頗  
喪徒旅鳥北飛不能達墮水死者皆有其象也蜀李雄  
書曰武皇帝雄泰成三年白鳥赤足來翔帝以問范賢  
賢曰鳥有反哺之意必有遠人懷惠而來果關中流民  
請降宋書孝武大明五年六月赤鳥見蜀郡益州刺史  
劉思考以獻周書武帝保定天和等年益州獻三足鳥  
者凡數次按相如大人賦以三足鳥爲之使矣

山海經崑山江水出焉有鳥狀如鴉而赤身白首其名  
曰竊脂可以禦火郭璞註云今呼小青雀曲嘴而肉食  
者爲竊脂疑非按本草云蜀徼有火鴉能啣火是也人  
家多避之山海經乃謂其可以禦火是必以焚灼之具  
而作威福于人者

黔中有山胡鳥善鳴一作山呼東坡過涪州得山胡詩  
云終日鎖筠籠回頭惜翠茸誰知聲噓噓亦自意重重  
夜宿烟生浦朝鳴日上峯故巢何足戀鷹隼豈能容

蜀都賦彈言鳥於森木註言鳥鸚鵡也南方異物志曰  
鸚鵡有三種青大如烏白者白大如鴟鴞者五色大於  
青雀者交州巴南盡有之凡鳥四指三向前一向後此  
獨兩指向後性好食芝麻劉艾漢獻帝傳興平元年詔  
曰往者益州獻鸚鵡三枚夜食三升麻子今穀價騰貴  
此鳥無益有損可付安西將軍楊定令歸本土是矣予  
武擔署園中有松樹數株每花熟時此鳥羣過而掠之  
颯颯有聲綠雲蔽天登時花爲之盡采摘稍遲惟有悵

惜

唐節度使韋公臯常蓄一鸚鵡其夫人河東裴氏教以念佛他日奄化用闍維法葬之有舍利十餘粒乃作塔記云元精以五氣授萬類雖鱗介羽毛必有感清英純粹者或炳耀離火或稟竒蒼精皆應乎人文以奉若時政則有革彼禽類習乎能言了空相於不念留真骨於已斃殆非元聖示現感於人心同夫異緣用一真化前歲有獻鸚鵡者曰此鳥聲容可觀音中華夏有河東裴

氏者志樂金僊之道聞西方有珍禽羣嬉和鳴演暢法音以此鳥名載梵經智殊常類意佛身所化常狎而敬之始告以六齋之禁比及辰後非時之食終夕不視固可以矯激流俗端嚴梵倫或教以持佛名號者曰當由有念以至無念則仰首奮翼若承若聽其後或俾之念佛則默而不答或謂之不念即唱言阿彌陀歷試如一曾無爽異余謂其以有念爲緣生以無念爲實際緣生不答以爲緣起也實際離言定本空也每虛室戒曙發

和雅音穆如笙竽靜鼓天風下上成文念念相續聞之者莫不洗然而嘉善矣於戲生有辰乎緣有盡乎以今年七月悴爾不憚已日而甚馴養者知其將盡乃鳴磬告曰將西歸乎爲爾擊磬爾其存念每一擊磬一稱彌陀佛洎十擊磬而十念成斂翼委足不震不仆奄然而絕按釋典十念成往生西方又云得佛慧者歿有舍利知其說者固不隔於殊類哉遂命火以闍維之法焚之餘燼之末果有舍利十餘粒炯爾耀日瑩然在掌識者

驚視聞者駭聽咸曰苟可以誘迷利世安往而非菩薩之化歟時有高僧慧觀常詣三學山巡禮聖迹聞說此鳥涕淚悲泣請以舍利於靈山用陶甃建塔旌異也余謂此禽存而由道歿有明徵古之所以通聖賢階至化者女媧蛇軀以嗣帝中衍鳥身而建侯紀乎策書其誰曰語怪而况此鳥有弘於道流聖證昭昭胡可默已是用不愧直書于詞貞元十九年八月十四日記

韋又蓄一孔雀鑿池以居之武公元衡來繼任此鳥猶

在使宅因作詩傷之一時屬和皆名士馬韓愈詩云穆  
穆鸞鳳友何年來止茲飄零失故態隔絕抱長思翠角  
高獨聳金華煥相差坐蒙恩顧重畢命守堦墀白居易  
詩云索莫少顏色池邊無主禽難收帶泥翅易結著人  
心頂毳落殘碧尾花銷闇金放歸飛不得雲海故巢深  
王建詩云孤號秋閣陰韋令在時禽覓伴海山黑思鄉  
橘柚深舉頭聞舊曲顧尾惜殘金顛悴不飛去重君池  
上心建又有傷韋令孔雀詞可憐孔雀初得時美人爲

爾別開池池邊鳳凰作伴侶羌聲鸚鵡無言語雕籠玉  
架嫌不栖夜夜思歸向南舞如今憔悴人見惡萬里更  
求新孔雀熱眠雨水饑拾蟲翠尾蟠泥金彩落多時人  
養不解飛海山風黑何處歸

武相國在蜀又有春曉聞鶯詩韓愈和云早晚飛來入  
錦城誰人教解百般鳴春風紅樹驚眠處似如歌童作  
艷聲王建和云侵黑行飛一兩聲春寒轉小未分明若  
教更解諸餘語應向宮花不惜情予按成都文類武公

元衡中秋登錦城樓詩席客和者至十許人皆知名士  
公亦節鎮之有文而好事者與

盛弘之荊州記曰雁塞北接梁州汶陽郡其間東西嶺  
屬天無際雲飛風翥望崖迴翼惟一處爲下朔雁達塞  
矯翻裁度故名雁塞同於雁門也梁州記曰梁州縣界  
有雁塞山傳云此山有大池水雁栖集之故因名曰雁  
塞成公綏雁賦云奔巫山之陽隅兮趨彭澤之遐裔矣  
方物略云荏雀每歲荏熟則羣至食其實性好鬪人捕

之哀錢使決勝負閭里曹觀至一雀直數千錢官司惡  
民贅聚每下符禁叱之贅曰緇綠廁彩喜荏充脰奮頸  
鵲顯矜健于咪里人哀貲以佐其鬪按荏菽今之胡豆  
也

傳玄蜀都賦曰鷹則流星耀景奔電飛光青駮素羽飄  
雪繁霜范鎮東魚記事云嘉陵江上見二鵲擲卵相上  
下以接之蓋習其飛也其胎教之意乎又翅羽未成躍  
出穴巢往往墜崖下死其天性峻勇是亦躁進之類也

予今歲在錦城立秋後一二日親見此種物盤空搶地作得意狀蓋非搏擊則不能躁進勢相因矣

山海經云梁渠之山有鳥焉名曰鶩其音如鵲食之止  
衡郭註治洞下也

盛弘之荊州記曰巫縣有鳥如鷓鴣其名爲鴟楚人謂之鵬青城外史云梟鳥晝不見泰山夜則察秋毫此往志所載也灌縣最多梟形如楚梟而小遇五更則鳴人鮮忌之然晝則目明夜則反暗此可以補記載之遺按

梟鳥不宜晝明而晝明者以時尚伺察白晝公行故耳何足異云

蜀都賦風胎若鵯註風胎鳥名未詳按莊子曰鵯相視眸子不運而風化卽此物也

蜀人呼鵯爲連點七五代時有問洪杲禪師曰如何是連點七師云屈指數不及地上無蹤迹

廣志曰野鴨雄者赤頭有距鷺生百卵一日再生有露華鷺以秋冬生卵並出蜀杜甫花鴨詩云花鴨無泥滓

堦前每緩行羽毛知獨立黑白太分明不覺羣心妒休  
牽衆眼驚稻梁霑汝在作意莫先鳴甫又有鷓鴣詩云  
故使籠寬織須知動損毛看雲莫悵望失水任呼號六  
翻曾經翦孤飛卒未高且無鷹隼慮留滯莫辭勞蓋多  
自況之意也

獸

李膺益州記云張道陵登仙之所常有麒麟白鶴遊翔  
其上武陽志云漢朱褒獲麒麟於馬頰嶺故界有麒麟

橋也唐書元和七年冬東川觀察使潘孟陽奏龍州平武縣嘉禾生有麟食之麟之來羣鹿環之光彩不可正視使畫工圖獻焉張仲素表賀曰伏見劍南東川觀察使潘孟陽奏龍州寶華山中有麟見獨角馬蹄遍身光耀并嘉禾二十二莖至八十九穗麟見與鹿每來同食各畫圖函盛封進者臣聞六合同歸則麒麟至天下和一則嘉禾生伏惟陛下昭事上帝凝情衢室宵興滌慮申旦忘倦大敷至化以永時邕故得希世之祥應我皇

運異質卓犖奇彩光明顧步幽巖發聞郡國神物自生  
於聖日靈編徒載其嘉名况大田之中衆穗斯茂沐以  
膏澤扇其祥風而後呈彼珍羣承茲共飢必生長畝之  
秀以期王者之瑞因緣所驗鄭重合符有以識上聖之  
心兆至和之本德超千古慶洽無疆日月所均無思不  
服臣等幸覩休異喜萬恒情無任抃躍之至按蜀檮杌  
王建武成年麒麟屢見則皆僞物不足書也

漢神爵中方士言益州有金馬神詔資中王褒往祠之

蜀都賦所謂金馬騁光而絕景也今成都治內有金馬坊坊側有祠宋賜額名昭應云華陽國志曰會無縣有天馬河天馬日行千里死於蜀葬江原小亭今天馬塚是也縣有天馬祠民家馬牧於山下或產駿駒云天馬子今有天馬徑厥跡存焉

元微之曰德宗皇帝以八馬幸蜀七馬道斃唯望雲騅來往不頓貞元中老死天廐臣稹作歌以記之憶昔先皇幸蜀時八馬入谷七馬疲肉綻筋攣四蹄脫七馬死

盡無馬騎天子蒙塵天雨泣巉崿道路淋漓濕崢嶸白  
草眇難期諛洞黃泉安可入朱泚圍兵抽未盡懷光寇  
騎追行及嬪娥相顧倚樹啼鵙鷺無聲仰天立圍人初  
進望雲騅衫色頗頽衆馬欺上前噴吼如有意耳尖卓  
立節竄竒君王試遣迴胃臆撮骨鋸牙駢兩肋蹄懸四  
跼腦穎方胯聳三山尾株直圍人畏誚仍相惑此馬無  
良空有力頻頻嚙掣轡難施往往跳趨鞍不得色沮聲  
悲仰天訴天不遣言君未識亞身受取白玉羈開口銜

將紫金勒君王自此方敢騎似遇良臣久悽惻龍騰魚  
鼉倬然驚驥盼驢騾少顏色七聖心迷運方厄五丁力  
盡路猶窄索駝山上斧刃堆望秦嶺下垂頭石五六百  
里真符縣八十四盤青山驛掣開流電有輝光突過浮  
雲無朕跡地平險盡施黃屋九九屬車十二纛齊映前  
導引驢頭帝自奉天奔梁道險溢齊映為帝御會  
馬駭突帝命捨轡映曰馬奔蹏不過傷  
臣捨之或  
驚清蹏嚴震迎號抱驢足時震為山南西道節  
度使聞帝徙蹏表  
迎奉路傍垂白天寶民望驢禮拜見驢哭皆言玄宗

當時無此馬不免騎驃來幸蜀雄雄猛將李令公

李晟也收城殺賊討狼空天旋地轉日再中天子

却坐明光宮朝廷無事忘征戰校獵朝回暮毬宴

御馬齊登擬用槽

厩中號乘輿之馬曰擬用槽

君王自試宣

徽殿圍人還進望雲騅性強步闊無方便分驥擺

仗頭太高擘肘迴頭頂難轉人人共惡騅迴跋

潛遣飛龍減芻秣銀鞍繡韉不復施空盡天年御

槽活當時鄒諺已有言莫依功高浪開闊登山

縱似望雲雕平地須饒紅叱撥長安三月花垂草

果下翩翩紫騮好千官煖熱李令閒

平朱泚之後天

子既厭兵患將臣生事而張延賞當國復與李晟有隙勸帝奪其兵柄

百馬生獐望

雲老望雲雕爾之種類世世奇當時項王乘

爾祖分配英豪稱霸主爾身今日逢聖人從

幸巴渝歸入秦功成事遂身退天之道何必

隨羣逐隊到死蹋紅塵望雲雕用與不用各有時

爾勿悲

資暇集云成都府出小駟以其便於難路號爲蜀馬今宣城郡亦有小馬時人皆呼爲宣州蜀馬也晉史明帝密知王敦將舉兵內向乃乘巴滇駿馬微行至于湖陰察敦營壘敦覺而追帝帝乃馳去馬有遺糞處輒以水灌之北魏李孝伯宣旨語張暢曰若須大馬魏主當送脫須蜀馬亦有佳者唐人嘲武懿宗曰長弓度短箭蜀馬臨階鷁蓋以蜀馬之低尚須臨階乃得上其無超距之勇自見字書鷁音匹轉躍而上馬也大都蜀馬短小

精悍俯仰便捷亦地勢使之然耳予閱後梁春秋武陵王紀在蜀器甲殷積有馬八千匹元和郡縣志劍南節度唐都管兵三萬四千七百人馬三千匹蜀檇王建成武成二年講武於星宿山步騎二十萬官馬八千私馬四千雖各侈其盛而神駒名駿未常旦暮遇之者及觀渝州志載謨烈輯遺云洪武四年明昇以全蜀降獻良馬十其一色正白蓋得之於羅鬼國養龍坑牝馬與龍交而生者身長十有一尺首高數尺足之高比首殺其

二尺有肉隱起項下約厚五寸廣三寸餘貫脉絡腹至尾間而上精彩明晃振鬣一鳴萬馬爲之辟易韉勒近前則作人立而吼上謂天既生此英物必有神以司之親撰祝冊詔有司以牲醪祀于馬祖然後勅典牧副使高敞囊沙四百斤壓之人跨囊沙上使之游行苑中久之性漸柔馴適八月癸巳上將行朔月禮於清涼山壇於是乘之而出如躡雲而馳一塵弗驚皇情悅豫賜名飛越峯復命御用監馬晉臣繪其行藏焉斯蓋不世出

之物以待不世出之主也噫真神哉

鄭榮開天傳信記云玄宗將登封泰山益州適進白騾  
潔朗豐潤權奇偉異上遂親乘之柔習安便不知登降  
之倦也告成禮畢復乘而下至山坳少休有司奏白騾  
無疾而殪上歎異久之諡曰白騾將軍命有司具槨殯  
以葬之疊石爲墓在封禪壇北里許

華陽國志秦昭襄王時白虎爲害自秦蜀巴漢患之乃  
重募有能殺虎者邑萬家金帛稱之於是夷胸忍廖仲

藥何射虎秦精等乃作白的弩於高樓上射虎中頭三節白虎常從羣虎瞋恚盡搏殺羣虎大咆而死按天官書參爲白虎蜀當井參分野故白虎常爲害也

朝野僉載周武后永昌中涪州多虎暴有一獸似虎而大逐虎噬殺之錄奏檢瑞應圖乃首耳也不食生物有虎則殺之

蜀記文翁在蜀日常言少力田方聚柴爲陂未就夜有百十野猪鼻載土著柴中比曉塘成稻常倍收又嘗欲

斷一大樹指斷處去地一丈八尺祝曰吾得二千石斧當着此處因擲之正着欲砍處

爾雅靡牛註云靡音麻重千斤出巴中犂牛註云牛之大者出蜀中山海經曰岷山多犍牛犀象晉興元年此牛出上庸郡人弩殺之得三十擔肉博物志曰越嶲國有牛稍割取肉經日必復生如故按玄中記云割而復生名曰反牛矣莊子云犛牛大若垂天之雲註云出荆夔間角向前毛白如雪今人常以爲拂子方物志云

犛牛出西羌尾長而動中國以爲纓人或射之則自斷  
其尾若左氏所謂雄鷄也闕駟十三州志云旄牛縣屬  
蜀郡出旄牛歲貢其尾以爲節旄宋孔甯子犛牛賦曰  
惟茲獸之攸生亦棲遐而憑阻遁綿野於岷隅挹清源  
於庸渚奔逸躅而倫珍載賁首而亂矜茸長髦之髣髴  
戾狼情而首鼠邁羔羊之如膏侔蜉蝣之楚楚既作表  
於禮樂又爲容於軍旅奉藩岳之休明被戎荒而既序  
班琛賂而來庭超筇藟乎其所矣

爾雅云南方之美者有梁山犀象焉巴浦之犀其可遇  
乎常璩云會無土地時產犀牛江表傳曰諸葛亮討賊  
還成都孫權遣勞問之送馴象一頭與劉禪子觀國史  
傳征虜圍成都僞相戴壽等驅象出戰而今不可得也  
爾雅云麋大羊疏略曰西域多兩角有一角者爲勝角  
甚多節處處圍繞別有山羊角極長惟一邊有節節亦  
疎大而不入用羗夷云此即名麋羊一名龍羊益州方  
物略龍羊出吐蕃及威茂州形似蓄羊而大其角繚繞

重八九兩黑質而白文可以爲帶胯其用亂犀贊曰羊質而大角繚于首以角之珍軀殘獵手按本草麇羊質堅可碎金剛一絲貫頂持入耳邊自鳴能清肝肺熱夜眠倒掛于樹上人覓之不可得禪家有麇羊掛角之喻也市所鬻者山羊耳益部談資云羚羊皮毛色青兵中卧之有警則自動又云羊名蟠者其角年久而蟠皮可坐數人恐亦祇可作談資也

唐書張說爲相時玄宗意欲討吐蕃說密奏許其通和

以息邊境玄宗不從及瓜州失守王君奭死說因獲嵩  
州鬪羊上表獻之以申諷諭其表云臣聞勇士冠鷄武  
夫戴鷄推情舉類獲此鬪羊遠生越雋蓄性剛決敵不  
避強戰不顧死雖爲微物志不可挫伏惟陛下選良家  
於六郡求猛士於四方鳥不遁才獸不藏伎如蒙効奇  
靈圃角力天塲却鼓怒以作氣而躑躅以奮擊趺若奔  
雲之交觸碎如轉石之相叩裂骨賭勝濺血爭雄敢毅  
見而衝冠鷙狼聞而擊節冀將少助明主市駿骨揖怒

蛙之意也若使羊能言必將曰若鬪不解立有死者所  
賴至仁無殘量力取勸馬臣緣損足未堪履地謹遣男  
詣金明門奉進玄宗深悟其意賜絹及雜綵一千匹是  
則以鬪止鬪以羊活人賢于大宛馬邛竹杖遠矣

韻會云益州有鹿麕乃鹿之美者蜀州古有鹿市之說  
今不能有也蜀都賦云射噬毒之鹿註云有神鹿兩頭  
主食毒草名曰食毒鹿出雲南郡此魏宏南中所記然  
汶山亦有之九州要記云汶山有食藥鹿其腸中糞亦

療毒疾是矣

晉史秦始年白鹿見梁州刺史杜幼文以聞游梁雜記  
縈經山中畋人得一白鹿將以獻邑侯其鬣如銀兩角  
透明角尖挂一銅牌上有數字磨勘莫辨惟一唐字稍  
現邑侯命釋之

蜀中亦往往有白兔嘉靖初獲自梁山者守臣導諛以  
獻不久尋斃而建亭豎碑焉今謂之白兔亭也酉陽雜  
俎引韋絢云巴州兔皆作狸斑寰宇記云蜀中舊無兔

鵠隋王秀鎮益州命左右齎往鵠尚稀而兔已衆矣  
詩話云川北山中多麝絕愛其臍每爲人所逐勢且急  
即自投高巖舉爪裂出其香就繫而死猶拱四足以保  
其臍李商隱詩投巖麝褪香以此青城外史載嵇康云  
麝食栢而香今吐蕃山中最多麝但此獸好食蛇中散  
之言未爲實錄也然今之名存而實亡者何必麝然  
猿蜀郡山中多有之惟三峽最著酈道元云魚復縣廣  
陵峽多猿猿不生北岸非唯一處或有取之放著北山

中初不聞聲將同狢獸渡汶而不生矣此三峽之首也  
荊州記曰峽中猿鳴至清諸山谷傳其響泠泠不絕行  
者歌之曰巴東三峽猿鳴悲猿鳴三聲淚霑衣然其通  
臂善緣騰空攬蔓能於空中輪轉以磊礫擲于下舟  
人避之陳蕭詮詩桂月影才通猿啼迴入風隔巖還嘯  
侶臨潭自響空挂藤疑欲飲吟枝似避弓別有三聲淚  
霑裳竟不窮杜甫詩云裊裊啼虛壁蕭蕭掛冷枝艱  
難人不免隱見爾應知慣習元從衆全生或用奇前

林騰每及父子莫相離曹松詩云曾宿三巴路今來不  
願聽雲根啼片白峰頂擲尖青護果憎禽啄栖霞覩葉  
零唯應卧嵐客憐爾傍岳局此皆狀其輕便險絕之致  
也馬戴詩云日飲巴江水還啼巴岸邊秋聲巫峽斷夜  
影楚雲連露滴青楓樹山空明月天誰知泊船者聽此  
不能眠皎然詩云萬里巴江水三聲月峽深何年有此  
路幾客共沾襟斷壁分垂影流泉入苦吟淒淒離別後  
聞此更傷心此皆觸其別離羈旅之緒也岑參在郡邸

聽猿詩云峨眉烟翠新昨夜秋雨洗分明峰頭樹倒插  
秋江底久別二室間圖它五斗米哀猿不可聽北客淚  
如涕崔塗在僧舍聽猿詩云哀猿聽未休禪景夜方幽  
暫得同僧靜那能免客愁影搖雲外樹聲裊月中秋曾  
向巴江宿當時淚亦流段成式在書齋聽猿詩云却憶  
書齋值晚晴挽枝間嘯激蟬清影沈巴峽夜巖色蹤絕  
石塘寒瀨聲是境雖不同而調則皆苦矣

王周集施南太守以猿兒爲寄云得之黔中頭生即白

者作詩答之云虞人初獲酉江西長臂難將意馬齊今  
日未啼頭已白不堪深入白雲啼此白頭猿也

禹貢梁州貢熊羆狐狸織皮西京雜記熊羆毛有綠光  
長二尺者直百金卓王孫有百雙詔使獻二十枚

西山經云西百七十里曰南山多猛豹似熊而小毛淺  
有光澤能食蛇及銅鐵按子虛賦有鋌猛氏格蝦蛤孟  
康曰皆獸名郭璞曰今蜀中有猛氏獸似熊而小毛淺  
有光澤也

蜀都賦戟食鐵之獸註貊獸毛黑白臆似熊而小以舌  
舐鐵須臾便數十斤出建寧郡其皮毛麕厚中蓐席爾  
雅獬即白豹唐世多畫作屏白傳有贊序之抱朴子東  
方識啖鐵之獸寔賴神禹之書大荒之籍矣

游梁雜記云楚夷有火獸形如黑羊兩角尖舉火夜光  
燭天出沒不常楚人一見即合村戶鳴鑼逐之獸驚入  
井即以犬血投入遲則火從井中出焰及禾苗田畦屋  
舍盡成焦土其地三年不植

博物志云蜀中南高山上有物如獼猴長七尺能人行  
健走名曰猴獮一名化或曰猓獮同行道婦女美者輒  
盜去人不得知行者每過其傍皆以長繩相引然故不  
免此得男女氣自爾故取女也取去爲室家其年少者  
終身不得還十年之後形皆類之意亦迷惑不復思歸  
有子者輒俱送還其家產子皆如人有不食養者其母  
輒死故無敢不養也及長與人無異皆以楊爲姓一作  
羊馬姓此唐蒙所記矣

珙志有獸曰野干似猿髮長過面欲有所視則搖頭以手披之

方物略云獾出邛蜀間與猿猱無異但性不躁動肌質豐腴蜀人炮蒸以爲美味也贊曰獾與猿猱同類異種彼美豐肌登俎見用

呂氏春秋曰禹年三十未娶行塗山恐時暮失嗣辭曰吾之娶必有應也乃有白狐九尾而造於禹禹曰白者吾服也九尾者其證也於是塗山人歌曰綏綏白狐九

尾龐龐成子家室我都悠昌乃娶塗山氏

山海經曰武都之山黑水出焉其上有玄狐蓬尾註大尾也

蜀地志曰涪陵南界榛險中有果然獸形如狗子頭似虎尾柔滑白黑色皮以爲裘輕煖可珍其身不過三尺尾長四尺餘脇邊皆斑集十皮可得一褥繁紋麗好細厚柔澤段氏遊蜀記云戎州進果然褥卓褐碧三色相間云出馬湖江石門兩路蠻界內宋樂史子正作蜀中

詩云又聞猱然獸死不相棄遺按國史補得一猱然則數十可得蓋此獸不忍傷其類雖殺之不去獸狀而人心者也

益州方物略猱威茂等州南詔夷多有之大小正類猱惟毛爲異朝制内外省以上官乘馬者得以猱爲藉武官則内容省使宣徽使乃得用贊曰狀實猱類體被金毳皮以藉焉中國之貴李廌師友談記云猱座文臣兩制武臣節度使以上許用每歲九月乘三月撤無定日

視宰相乘則皆乘之撤亦如之猱似大猴生川中其脊毛最長色如黃金取而縫之數十片成一座價值錢百千杜詩云猱擲寒條馬見驚即此

郡國志戎州棘道縣有獸名獬独似猿而四足短一騰一百五十步如迅鳥之飛取此皮爲狐白之用盈百方成按猱黑身白腰手有長白毛者是

蜀都賦晶貍氓於蔓草註謂貍氓虎豹之人也博物志江漢有貍人即此

楊大年談苑淳化中綿州貢羅江犬常循於御榻前太宗不豫犬不食及上僊號呼涕泗以至疲瘠見者隕涕參政李至作桃花犬歌以寄史館錢若水末句云白麟赤雁且勿書願君書此驚浮俗按羅江縣西雲蓋山之桃花溪出此犬毛赤白相間若桃花色傳以爲桃神所萃即能改齋所云綿州八子之一也宣室志云郭司空釗太和中自梓潼移鎮西京命閹者爲市綾繪絲帛百餘段其價倍以爲欺即囚於獄用致其罪獄具命笞之

忽有十餘犬爭擁其背吏卒莫能制釗大異之且訊其事閹者曰某好閱金剛經自幼稚常以食飼羣犬不知其他釗歎曰犬尚能感人惠吾安可以不施恩遂釋之噫此二犬者真可以媿人

蜀中廣記卷五十九

欽定四庫全書

蜀中廣記卷六十

明 曹學佺 撰

方物記第二

鱗介

常璩云魚復縣有澤水神天旱鼓其傍即雨故蜀都賦  
云潛龍蟠於沮澤應鳴鼓而興雨也公孫述據蜀殿前  
井中有白龍出以爲瑞應因自號白帝改元曰龍興即

此地矣

後漢書桓帝永康元年八月己郡奏黃龍見郡池中吏  
傳堅言于時民以天熱欲就池浴見池水濁因戲相恐  
此中有黃龍語遂行人間郡欲以為美故上言及建安  
二十三年黃龍見捷為武陽之赤水九日昭烈以為己  
受命之祥立廟赤水溪上以祀之有碑曰黃龍甘露之  
碑

晉書泰始二年七月黃龍見巴西閬中咸寧二年十月

黃龍二見于漢嘉靈關水經注越雋靈道縣有銅山山  
人有劉慈者晉泰始九年黃龍二見于慈池縣令董玄  
之率吏民觀之以白刺史王濬濬表上之因改護龍縣  
也

任豫益州記云嘉魚蜀郡處處有之狀似鯉而鱗細如  
鱖肉肥而美大者五六斤食乳泉出丙穴者二三月隨  
水出穴八九月逆水入穴郡國志嘉魚蜀中謂之拙魚  
亦謂之魚舅也錄異記曰嘉魚鯪魚也形如鱖人以芭

蕉葉隔火炙之肥美莫及宋祁方物贊云南有丙穴厥  
產嘉魚鯉質鱗爲味珍腴楊慎異魚贊云南有嘉魚  
出於丙穴黃河味魚嘉美相頡最宜爲鮓隔以蕉葉不  
爾脂腴將滴火滅又云嘉州魚舅載新厥名鱗鱗迎媵  
夫豈其甥其文實鮓江圖可徵

方物略云黑頭魚形若鰕長者及尺出嘉州歲三月則  
至惟郭璞臺前有之里人欲怪其說則言璞著書臺下  
魚吞其墨故首黑贊曰黑首白腹修體短額春則羣泳

促畧斯獲嘉州又有客朗魚似鮓肉嫩而美不恒有也  
荊州記魚復古縣名土人謂鱣鯉至此復回不再上也  
水經注魚復縣已鄉村側有溪溪中有魚其頭似羊豐  
肉少骨美於餘魚矣

韻會云鮓魚蜀曰鮓鮓出鞏山穴中三月遡河上能度  
龍門則爲龍李奇注子虛賦周洛曰鮓蜀曰鮓毛詩義  
疏曰鮓似鱣而色青黑頭小而尖如鐵兜鍪口在頷下  
大者七八尺益州人謂之鮓鮓大者王鮓小者叔鮓也

註爾雅曰鱣大魚也似鰻而短鼻口在頷下體有邪行甲無鱗肉黃大者長二三丈江東人呼爲黃魚酉陽雜俎曰蜀中每殺黃魚天必陰雨

南中八部志曰邛河縱廣岸二十里深百餘丈有大魚長一二丈頭特大遙視如戴鐵釜狀越舊志衛北二十五里魚洞河源出吐蕃合羅羅河入大渡河其中出大魚漢志邛部河長魚是也

方物略云鯨魚出蜀江背鱗黑而膚理似玉蜀人以爲

鱠味美贊曰此鯽則大膚縷玉瑩以膾諸庖無異雋永  
又云沙綠魚魚之細者生隈瀨中狀若鰠大不五寸美  
味蜀人珍之贊曰長不數寸有駿其文淺瀨曲隈唯泳  
而羣又云石鰲魚狀似鯽而小上春時出自石間庖  
人取爲奇味贊曰鯽鱗么質本不登俎以味見錄雖細  
猶捕

魏武食制云蜀有蒲魚其形如粥出于郫縣蒲村之麓  
廣志曰武陽小魚大如針號一斤千頭蜀人以爲醬也

酉陽雜俎鯢魚如鮎四足長尾能上樹天旱輒含水上  
山以草葉覆身張口鳥來飲水因吸食之聲如小兒峽  
中人先縛之於樹鞭之身上白汗出如溝汁去此方可  
食不爾有毒鯢志作鯢范鎮東齋筆錄作鮎方物略云  
鮎魚出西山溪谷及雅江狀似鯢有足能緣木其聲如  
兒啼蜀人鮠之贊曰有足若鯢大首長尾其啼如嬰緣  
木弗墜

蜀都賦石鱮水螭註石鱮石魚也如石燕

巴郡志溫泉峽有魚生長溫湯中不可食

洪雅志有人魚其手足似人寰宇記魚蛇水在青神縣水有魚似蛇即魚耶江也又云維州產魚虎有舌口如棘能食魚

東坡云予別業前泉水相傳有二牝豬潛其中化爲二鯉蓋豬龍也一日偶見之以告妻兄王愿疑予誕同禱於泉見二鯉躍出今眉州南石佛鎮是其處

丹淵集史少訥見許江豚未得以詩戲之云霜重水落

岸有冰江豚乘寒弄晴日搖波拍浪乍羣起尾厚喙長  
鬚鬣赤漁人清曉橫巨舟一舉大網凡數頭想君盤飴  
已厭足何不略遣來陵州是時與可守陵州故云

揚雄蜀本紀云張儀城成都輒頽壞時見大龜出於江  
迴旋而行儀以問巫巫曰循龜迹築城功可就乃從之  
至今蜀人呼爲龜城戎幕間談曰予未至郡日嘗聞龜  
殼猶在成都昨詢訪耆舊有軍資庫官宇文遇者言比  
常在庫中元和初節度使高崇文命工人截爲腰帶胯

具自張儀至崇文千餘載古物尚在而武臣泯之深可惜也

爾雅註云涪陵出大龜緣中义似瑇瑁即今甯螭龜一名靈螭能鳴譙周異物志曰涪陵龜其甲可以卜即此魏元帝奐之世獻靈龜于相府因名其地爲龜溪矣

劉敬叔異苑云元嘉初益州刺史遣三人入山伐樵迷路忽見一龜大如車輪四足各躡一小龜而行又有百餘黃龜從其後三人叩頭請示出路龜乃伸頭若有意

馬因共隨逐得出有捉小龜歸家以爲臙者須臾暴死  
錄異記云有於蜀江之上獲巨鼃者長尺餘其裙朱色  
煮之經宿遊戲自若又加火一日水涸而鼃不死舉家  
驚懼以爲龍類也乃投於江中浮泛而去

山海經曰岷山江水出焉其中多鼃郭註鼃似蜥蜴大  
者長二丈有鱗彩皮可以冒鼓元和郡縣志利州綿谷  
縣穿山一名胡頭山有山鼃伏於空處皮可爲甲刀箭  
所不能入

瑯嬛記云王吉夜夢一螾蜥在都亭作人語曰我翌日當舍此吉覺異之使人于都亭候之司馬長卿至吉曰此人文章當橫行一世天下因呼螾蜥爲長卿卓文君一生不食螾蜥

螾蜥

本草金蠶始于蜀中狀如蠶金色日食蜀錦四寸褰宇記成都聖壽寺有青衣神祠神即蠶叢氏也相傳蠶叢氏始教人養蠶時家給一金蠶後聚而弗給瘞之江上

爲蠶基宋魯應龍閒牕括異云金蠶色如金食以蜀錦取其遺糞置飲食中毒人必死善能致他財使人暴富遺之極難雖水火兵刃不能害多以金銀藏篋置其中投之路隅人或收之以去謂之嫁金蠶也

爾雅獨者蜀也蜀蟲名此虫大如指似蠶而無羣故云蜀

山海經云巴蛇食象三歲而出其骨君子服之已心腹之疾其爲蛇青黃赤一曰黑蛇青首在犀牛西郭璞贊

曰象實巨獸有蛇吞之越出其骨三年爲期厥大何如  
屈生是疑玉堂閒話云有遊於瞿塘峽者冬月草枯野  
火燎其峰巒連山跨谷紅焰照天忽聞巖岸之間大石  
摧墜輻礚有聲遂駐足伺之見一物圓如大圜硯至平  
地細看乃一蛇也遂剖而驗之乃吞鹿於腹因野火燒  
而墮耳元稹巴蛇詩序云巴之蛇百類其大蟒其毒褰  
鼻蟒人常不見褰鼻常遭之毒人則毛髮皆豎起飲溪  
澗而泥沙盡沸驗方云攻巨蟒用雄黃烟被其腦則裂

而鷄

音淫  
鷄屬

鳥能食其小者已無是物其民常用術禁之

尤効詩曰巴蛇千種毒其最鼻塞蛇掉舌翻紅焰盤身

感白花噴人豎毛髮飲浪沸泥沙欲學叔敖瘞其如多

似麻又越嶺南濱海武都西陷戎雄黃假名石鷄鳥遠

難籠詎有隳腸計應無破腦功巴山晝昏黑妖霧毒濛

濛又漢帝斬虵劍晉時燒上天自茲繁巨蟒往往壽千

年白晝遮長道青溪蒸毒烟戰龍蒼海外平地血浮船

大荒南經曰榮山黑水之南有玄蛇食塵郭璞註今南

方蚺蛇吞鹿亦此類風俗通曰車騎將軍巴郡馮緄爲  
議郎發綬笥有二赤蛇可三尺分走南北大用憂怖卜  
云此吉祥也當爲邊將以東爲名後五年果爲大將軍  
拜遼東太守

北夢瑣言王蜀先主時修斜谷閣道鳳州衙將白某掌  
其事至武休潭見一婦人浮沈水面意其溺者命役夫  
鉤致岸濱忽化爲大蛟沒於潭中白以爲不祥因而致  
疾子誦岑參招北客賦云瞿塘之東下有千歲老蛟化

爲婦人衽服靚粧游於水濱白聞之方悟其爲蛟也疾  
尋瘳岑賦所言斯足爲證

又云蛟之爲物不識其狀非有鱗鬣四足乎或曰虬螭  
蛟蜃狀如蛇南僧說蛟如馬蟻即水蛭也涎沫腥粘掉  
尾纏人而噬其血蜀人號爲馬絆蛇頭如猫鼠有一點  
白漢州古城潭底有蛟人伐之乃躍于沙內蟠蜿力困  
里人謹噪以助竟斃之故見斯狀

玉堂閒話云巴賓之境民居溪壑以弋獵爲生有一畝

空洞穴深不能測獵師縱犬於此多呼之不迴瞪目搖尾時有彩雲垂下迎犬而昇如是者累年呼爲狗仙山一獵師獨不信遂綫一犬挾藥弧往觀至則以粗繩繫犬繫于拱木然後退身覘之及彩雲下犬縈身不能上嗥叫者數四旋見有物頭大如瓮雙目如電鱗甲光明冷照溪谷漸垂身出洞中顧其犬獵師乃張毒矢射中之其物不復見經旬日臭穢滿山獵師乃自山頂縋索下觀見一大蟒腐爛于岩間狗仙之事遂絕

川東山南五溪黔中皆有毒蛇烏頭反鼻蝮草中以尾  
倒鉤人去數步直來疾如激箭螫人立死中手斷手中  
足斷足不然則全身腫爛百無一活謂之蝮蛇又有黃  
喉蛇好蟠舍上無毒不害人唯善食毒蛇食飽垂頭直  
下沫滴地噴起變爲沙虱中人爲疾額上有大王字衆  
蛇之長常食蝮蛇又有碎蛇見人則分身爲數段人去  
復續如故

遊梁雜記云富順縣去城三十里有羅漢寺乃宋景祐

間建橫踞石梁水激之噴威注射浪湧濤翻嘗有一白蛇逆波而來遊入隙竇間初隱隱若匹練俄而蜿蜒大許如牽玉繩且時巨時細時脩時短儵忽不可控搏聞人笑語及梵唄聲愈逐響而來如抃如舞少頃不知所歸土人謂是神物隱谿中已數百年一名銀蛇溪

戎州志有虫曰蜋蛆食蛇即莊生所謂即且甘帶也噫蛇之爲物毒矣其種類亦繁矣而尚有食之者此事之不可知也

博物志云食巴豆之鼠三年重三十斤本草云鼯鼠蜀人謂之鼯鼠取其毛作筆鼯亦大也

劉敬叔異苑云成都有義鼠形如鼠短尾每行遞相咬尾三五爲羣驚之即散俗云見之者當有吉兆梁州記曰唐公房登仙於輦鄉山山有易腸鼠一月三吐易其腸東廣微所謂唐鼠者也博物志云唐公房升仙鷄狗並去惟以鼠惡棄之鼠悔恨一月三吐其腸

寰宇記利州產鯖子按鯖小貝也鮒也音與積同周禮

註疏蟻小而橢他果切螺匾也東坡論字詩云壁美何妨橢徐季海作字多匾坡公效之或謂之石壓蝦蟆

景渙牧豎閒談云知邛州事龔穎建溪人即真君靖之遠孫真君昇天之後渙嘗病耳聾龔曰恨蜀中無紫粉爲子脩藥餌之立差因以尋常紫粉畀之龔笑曰此非真紫粉紫粉乃蘇枋樹間自然虫糞也是渙錯認紫粉五十年矣

嘉祐雜志峨眉雪蛆治內熱陸游云予至蜀乃知此物

實出茂州雪山雪山四時常有積雪彌遍嶺谷蛆生其中雪時得之能蠕動雪消蛆亦消益部談資曰雪蛆產岷峨深澗其形如蝟但無刺肥白長五六寸腹中惟水身能伸縮取食之須在旦夕間否則化矣

北夢瑣言曰陳藏器本草砂俘即倒行蝸子也蜀人號曰俘鬱旋穴乾土爲孔常睡不動取致枕中令夫妻相悅愚遊成都止于逆旅與賣草藥李山人相熟見蜀城少年往往欣然而訪李生仍以禮物酬酢詰之人曰客

敬李生媚藥耳徵其所用乃砂俘也

胸臆音蠢潤地下濕則多此蟲劉禹錫嘉話云胸臆蚯蚓也常至夜江畔出其身半跳於空中而鳴上音屈下音忍說文曰胸臆從肉旬聲黃朝英云考其義當作潤蠢胸如順切臆尺允切與禹錫音不同按胸臆漢縣名今梁萬間是其地

爾雅土螽地中作房啖其子即馬蠡今荆巴間呼爲蠶方物略云金蟲出利州山中蜂體綠色光若金里婦取

以佐釵鐶之飾贊曰蟲質甚微翠體金光取而槁之參飾釵梁酉陽雜俎蜀中有竹蜜蜂好於野竹上結窠窠大如鷄卵有蒂長尺許窠與蜜並紺色可愛甘倍於常蜜方言云蟻螬虫梁益之間謂之蜾元稹蜾蜂詩三首序云蜾亦蜂類而大巢在寨鼻虵穴下故毒螫倍諸蜂蜾中手足輒斷落及心胷則圯裂用它蜂中人之方療之不能愈巴人往往持禁以制之則差詩云巴虵蟠窟穴穴下有巢蜂近樹禽垂翅依原獸絕蹤微遭斷手足

厚毒破心胃昔甚招魂句那知眼自逢又梨笑清都月

京師開元觀  
多梨花蜂

蜂游紫殿春構脾分部伍嚼藥奉君親翅

羽頗同類心神固異倫安知人世裏不有噬人人又蘭  
蕙本同畹蜂虻亦雜居害心俱毒螫妖焰兩吹噓雷蟄  
吞噬止枯焚巢穴除可憐相濟惡勿謂禍無餘

方言曰虻蜂西南梁益間謂之玄灼陶宏景曰地膽出  
梁州狀如大馬蟻有翼太平廣記忠州墊江縣吏冉端  
唐開成初父死有嚴師者善山岡爲卜地云合有王氣

羣聚之物掘深丈餘遇蟻城方數丈外重雉堞皆具子  
城譙櫓工若彫刻城內分徑街小埕相次每埕有蟻數  
千幢幢不絕徑甚淨滑樓中有二蟻一紫色長寸餘足  
作金色一稍小有羽細腰白翅翅有經脈疑是雌者衆  
蟻約有數斛城隅小壞以堅土爲蓋故中樓不損既掘  
露蟻大擾若求救之狀吏遽請縣令李玄之詣觀已勸  
吏改卜嚴師伐其卜驗爲得地請遷蟻于巖側狀其所  
爲仍布石粟覆之以板經旬嚴師忽得病若狂或自批

觸穢詈大呼數日不已令素厚嚴因爲祝蟻療以雄黃  
丸方愈元稹蟻子詩三首序云巴蟻衆而善攻櫟棟往  
往木容完具而心節朽壞屋居者不省其微而禍成傾  
壓詩云蟻子生無處偏因濕處生陰霑煩擾攘拾粒苦  
詈譚<sub>音能</sub>牀上主人病耳中虛藏鳴雷霆翻不省聞汝作  
牛聲又時術功雖細年深禍亦成攻穿漏江海嗜食困  
蛟鯨敢憚櫟櫟蠹深防柱石傾寄言持重者微物莫全  
輕又攘攘終朝見悠悠卒歲疑詎能分牝牡馬得有蟻

蚺

音緣池  
蟻卵也

徙市竟何意生涯都幾時巢由或逢我應似

我相期

微之又有蚺蛛詩三首序云巴蚺蛛大而毒其甚者身

邊數寸而踦長數倍其絲網羅竹栢盡死中人瘡痛凜

音集濕且痛癢倍常用雄黃苦酒塗所啣仍用鼠婦蟲食

其絲盡輒愈療不速絲縈心而無及矣詩云蚺蛛天下

足巴蜀就中多縫隙容長踦虛空織橫羅縈纏傷竹栢

吞噬及蟲蛾爲送佳人喜珠櫳無奈何又網密將求食

絲斜誤着人因依方託緒挂眉遂容身截道蟬冠礙漫  
天玉露頻兒童憐小巧漸欲及車輪又稚子憐圓網佳  
人祝喜絲那知緣暗隙忽復嚙柔肌毒腠攻猶易焚心  
療恐遲看看長妖緒和扁欲漣湏

微之又有蝨詩三首序云巴之山谷間春秋常雨自五  
六月至八九月雨則多蝨道路羣飛噬馬牛血及蹄角  
旦暮尤極繁多人常用日中時趣程逮雪霜而後盡其  
嚙人痛劇浮蟻而毒不留肌故無療術詩云陰深山有

瘴濕熱草多蟲衆噬錐刀毒羣飛風雨聲汗粘瘡痂痛  
日曝苦辛行飽爾咀殘腹安知天地情又千山溪沸石  
六月火燒雲自顧生無類那堪毒有羣搏牛皮若截噬  
馬血成文蹄角尚如此肌膚安可云又幸螫終非久炎  
涼本遞興秋風自天落夏孽與霜澄一鏡開潭面千峰  
露石稜氣平蟲豸音雉死雲路好攀登

微之又有蟆子詩三首序云蟆蚊類也其實黑而小不  
礙紗縠夜伏而晝飛聞栢煙與麝香輒去蚊蟆與浮塵

皆已蛇鱗中之細蟲耳故醫人成瘡秋夏不愈膏楸葉  
而傳之則差詩云蟆子微於蚋朝繁夜則無毫端生羽  
翼針喙啗肌膚暗毒應難免羸形日漸枯將身遠相就  
不敢恨非辜又晦景權藏毒明時敢噬人不勞生詬怒  
祇足助酸辛隼皆看無物蛇軀庇有鱗天方芻狗我甘  
與爾相親又有口深堪異趨時詎可量誰令通鼻息何  
故辨馨香沈水來滄海崇蘭泛露光那能枉焚爇爾衆  
我微茫

蜀中廣記卷六十

欽定四庫全書

蜀中廣記卷六十一

明 曹學佺 撰

方物記第三

草

山海經高梁之山有草焉狀如葵而赤華莢實白桴可以走馬

淮南子曰巫山之上從風縱火紫芝與蕭艾俱死抱朴

子曰慮巫山之失火恐芝艾之并焚矣福地記云青城山上有沒溺池產甘露芝草也

李膺益州記云江州縣西南有仙池昔有仙人居池側起樓多植香草於樓下忽一夕縱火自焚天降紫雲飄然而去後人尚指此地爲香草樓按列仙傳有園客者種五色香草積十年與妻俱仙去或即此

宋祁方物畧長生草山陰巖地多有之脩莖茸葉色似檜栢而澤經冬不凋損故號長生贊曰色與栢類冉冉

其莖冬不甚黃故謂長生

又曰瑞草蜀人多種之庭檻蔓延長三四尺珍而愛之故謂之瑞贊曰翠蔓紺莖回繚可喜蔕之庭堂珍以爲瑞

薛濤鴛鴦草詩綠英滿香砌兩兩鴛鴦小但娛春日長  
不管秋風早宋祁曰鴛鴦草春葉晚生其稚蘢在葉中  
兩兩相向如飛鳥對翔贊曰翠蘢對生甚似匹鳥逼而  
觀之勢若偕矯

虞美人草亦謂之舞草獨莖三葉狀如決明一葉在莖  
端兩葉居莖半而相對人或近之抵掌謳曲必動搖如  
舞也酉陽雜俎益州草木記以爲雅州名山縣出行人  
唱虞美人曲則應拍而舞蜀志補罽以爲潼川州紫蓋  
山出動中音節移植他所則否唐人舊曲云帳中草草  
軍情變月下旌旗亂攬衣推枕愴離情遠風吹下楚歌  
聲正三更烏騅欲上重相顧艷態花無主手中蓮鐔凜  
秋霜九泉歸去是仙鄉恨茫茫按此屬詠虞美人事而

宋景文獨以虞當作娛意其草柔纖爲歌氣所動故或動搖美人以爲娛樂耳贊曰翠莖纖柔稚葉相當逼而歌之或合或張

方物略曰仙人縉與苔同種生岩陰石隈多鮮翠長二三尺叢垂若縉或言深谷有長丈餘者贊曰附陽而生垂若文縉大槩苔類土石所交

杜子美有從韋明府續處覓錦竹兩三叢詩黃鶴注云攷竹譜竹紀無錦竹意以其文如錦名之竹紀有蒸竹

箇墮竹其皮類繡豈即此乎余觀錦竹他無見惟杜詩  
有之劉會孟批錦樹行云題曰錦樹使人刮目錦竹亦  
新惜無拈出者耳近閱梅宛陵集錦竹詩云雖作湘竹  
紋還非楚筠質化龍徒有期待鳳曾無實本與凡草俱  
偶親君子室又注其下云此草也似竹而斑始知黃鶴  
有金注之昏耳出丹鉛錄

爾雅云有戎葵今蜀葵也華如木槿戎蜀蓋其所自出  
古今注曰戎葵一名茈苳有紅紫青白色莖葉不殊但

花色異耳晉傅玄曰蜀葵其苗似瓜瓠既大而結鮮紫色耀日也酉陽雜俎云蜀戎葵一名胡葵大者紅可以緝爲布枯時燒作灰藏火火久不滅花有重臺者予聞之蜀人燃其榦作炬雨中猶熾按淳化帖所載唐太宗二十三日勅云卿昨日道服蜀葵可錄方將來亦皆紅葵也宋顏延之蜀葵贊曰井維降精岷絡升靈物淑氣麗卉草之英渝艷衆葩冠冕羣英類麻能直方葵不傾梁王筠蜀葵花賦曰惟茲奇草遷花西道凌金坂之威

夷跨玉津之浩浩值油雲之廣臨屬光風之長掃仰椒  
屋而敷榮值蘭房而舒藻邁衆芳而秀出冠雜卉而當  
闈既扶疎而雲蔓亦灼爍而星微布濩交加蓊茸紛葩  
疎莖密葉翠萼丹華岑參蜀葵花詩昨日一花開今日  
一花開今日花正好昨日花已老人生不得恒少年莫  
惜牀頭沽酒錢請君有錢向酒家君不見蜀葵花

長樂花今蜀人謂之月月紅也六朝謂之紫花晉傳玄  
紫華賦曰紫華一名長樂花舊生於蜀其東界特饒中

國奇而種之余嘉其華純耐久可立冬而服故與友生  
各爲之賦云有遐方之奇草稟二氣之純精仰紫德之  
景曜因令色以定名剛莖勁立纖條繁列從回風以搖  
動紛蘭暢而蕙潔蔚青蔥以增茂並含華而未發於是  
散綠葉秀紫榮蘊若芝草之始敷灼若百枝之在庭獨  
參差以照耀何光麗之雜形煥煥昱昱而奪人目精下  
無物以借喻上取象於朝霞妙萬物而比豔莫茲草之  
可嘉唐蘇頌長樂花賦序曰蜀太守庭際有紫華草秋

中始繁英露洗冬早尚直本霜封蕪維大同於衆卉盛  
衰小異於羣物余訝而未識吏或告余曰此傅長虞所  
賦蜀長樂花也故心暗賞焉因口授書吏遂墨而成作  
恨不見古人所爲得髣髴其旨耳夫長者以短長之形  
度其長者則美夫樂者以哀樂之類同其樂者則喜長  
也樂也吾安得而聞之嘉纖植之並用偉令名今在茲  
徒見其豐族莽萼高標璀璨莖丹外而縞中葉縹分以  
紅貫綴綠穎之重疊縈紫蕤之爛熳迫而象之君子其

常或微或章聳危冠兮纓若綬默退靜其何望遠以意  
之佳人欲翔炫炫煌煌重羅綺兮撲瑤翠蹇來思而未  
嘗匪以幽兮自直匪以直兮自藏匪以晚兮自耀匪以  
耀兮自強文濁露之均灑庇清舒之汎光本無嫌於散  
地甘有寓於殊方然則太液初滿上林新霽羊茸灼爍  
萬品千計搖瑞色而函芝雜竒葩而轉蕙孰與夫玉堂  
金闕之偏賞白日青雲之特麗歲不與兮時向闌風蕭  
蕭兮夜漫漫賓遠鴻於沙塞叫離鶴於江干君曾不見

三月華矣盡林間之稿木千霜殞矣亦庭下之枯蘭懿  
此常度凌於早寒假春期而不採雖秋令而不殘衝雨  
霰之飛薄任雲山之險艱芳弗珍於霍靡節常慕於檀  
栾吾則知樹背之奚託傾心之可安如後凋之是貴罔  
獨立其誰觀文學掾起而爲亂曰白露瀼瀼何草不黃  
紫華的的生君之堂彼不伐兮秋自翳時或珍兮君是  
惠彤庭赫兮朱草駢交屈軼兮友賓連伊榛莽而荒此  
君曷爲兮賦旃

方物略云旌節花條脩華碧皆層層而擢正類使所持  
節然故以名見益州圖經贊曰擢條亭亭層層紫丹狀  
若使節方圖實刊蜀檣杙云王處回在蜀有道士稱朱  
桃推謁于階前以劒撥土取花子二粒種之須臾成花  
三朶謂處回曰此仙人旌節花也

方物略曰鵝毛玉鳳花本至卑纖蓬如釵股秋開不蘂  
而鬚狀似禽故曰鳳色白故曰玉以其分輕故曰毛贊  
曰華而無采狀類翔鳳公質毛輕翩欲飛動

金少府小集卷十一  
又曰添色拒霜花生彭漢蜀州花常多葉始開白色明日稍紅又明日則若桃花然贊云自濃而淺花則常態今顧反之亦物之怪

又曰羞寒花蜀地處處有之不爲人所愛依莖綴花蔽葉自隱俗曰羞天花予易爲羞寒花按本草名鬼臼贊云冒寒而茂莖脩葉廣附莖作花葉蔽其上以其自蔽若有羞狀

青城志云宋仁宗踐阼之六年縣奏上清宮庭木生異

花錫名曰太平瑞聖宋祁方物略瑞聖花出青城山中  
幹不條高者乃尋丈花率秋開四出與桃花類然數十  
跗共爲一花繁密若綴先後相繼而開九閱月未萎也  
蜀人號豐瑞花故程相國琳爲益州年繪圖以聞更號  
瑞聖然有數種其小者號寶仙淺紅者爲醉太平白者  
名玉真成都人競移蒔園中以爲尤玩云贊曰衆跗聚  
英爛若一房有守繪圖厥名乃章繁而不艷是異衆芳  
范成大詩雪外捫參嶺烟中濯錦洲密攢文杏藥高

結綵雲毬百世嘉名重三登瑞氣浮挽春同住夏看到  
火西流

圖經云蘭生於深林石門尤多有春蘭秋蘭崇蘭鳳尾  
蘭竹蘭石蘭春蘭花生於葉之下崇蘭花生於葉之上  
黃魯直幽芳亭記云一幹兩三花而香有餘者蘭一幹  
十數花而香不足者蕙按石門在敘府慶符縣古犍爲  
郡地諺云雅州蘭烏尤蕙則蘭蕙固自有分也

蜀中有花名賽蘭香花小如金粟特馥烈戴之髮髻香

聞十步經月不散佛經云天末香莫若牛頭旃檀天澤  
香莫若詹糖薰陸天華香莫若檠蒲伊蘭則伊蘭即此  
花也西域以之供佛後漢書所謂伊蒲之供矣

成都府治西園有辨蘭亭爲呂大防李大臨李之純三  
人倡和處微仲之言曰蜀有草如護紫莖而黃葉謂之  
石蟬而楚人皆以爲蘭蘭見於詩易而著於離騷古人  
所最貴而名實錯亂迺至於此予竊疑之迺詢諸游仕  
荆湘者云楚國之有蘭舊矣然鄉人亦不知蘭之爲蘭

也前此十數歲有好事者以色臭花葉驗之於書而名  
始著况他邦乎予於是信以爲蘭攷之楚辭又有石蘭  
之語蓋蘭蟬聲近之誤蘭其葉冬青其華凌寒其生沙  
石瘠土而枝葉峻茂其芳不外颺暖風晴日有時而發  
則郁然滿乎堂室是皆有君子之德此古人之所以爲  
貴也迺爲小亭種蘭於其旁而名曰辨蘭無使楚人獨  
識其真者斯命亭之意也

方物略云石蟬花始生其莒森擢長二三尺葉如菖蒲

紫萼五出與蟬甚類綠黃相側蜀人名其白者爲玉蟬  
花贊曰有萼穎然有萼敷然取其肖象莫類于蟬

本草蟬花出蜀中其蟬頭上有一角如花冠狀謂之蟬  
花方物略蟬花二川山林中皆有之蟬不蛻者至秋則  
花其頭長一二寸黃碧色治小兒瘰癧又能已瘡贊曰  
蟬不能蛻委于林下花生厥首茲謂物化

方物略云七寶花條葉大抵玉蟬花類也其生叢蔚花  
紫質絳贊曰擢穎挺挺盛夏則榮丹紫合英以實見名

又云朝日蓮花或黃或白葉浮水上翠厚而色澤形如菱花而差大開則隨日所在日入輒斂而藏于葉下若葵藿之傾太陽然贊曰素花碧葉浮秀波面日中則向日入還斂能改色云宋景文筆記謂蜀中有蓮大如雀轂葉舒如錢榦亦有絲其萼盛開而向日朝則指東亭午則溯南夕則西指隨日所至蜀人名曰朝日蓮予按鄭熊番禺記海南有向日蓮花似木芙蓉而極香開時東西向至暮而斂一呼夜合即此花也

敘志云西番蓮出夷地有黃赤二種幹圍六七寸葉長尺餘花如千葉蓮狀又一種幹如良薑長六七尺葉如芭蕉長三四尺花赤每花三四十瓣下瓣長四五寸至其端以漸而短瓣直聳不似蓮狀二三月花至冬方厭俗亦呼西番蓮

方物略云紅蕉花于芭蕉蓋自一種葉小其花鮮明可喜蜀人語染深紅者謂之蕉紅蓋倣其殷麗云贊曰蕉無中幹花產葉間綠華外敷絳質凝殷

金堂志有花名孤燕傳書

木

山海經曰廣都之野靈壽實華蜀都賦云靈壽桃枝注  
靈壽木出涪陵郡國志云南鄉峽西八十里有巴鄉村  
溪中多靈壽木也

益州記云犍道縣有荔枝灘灘東南二十里山頂有一  
冢唯生女貞樹樹上常有白猿栖息郡國志云犍道有  
玉女冢生女貞處是矣

灌縣有秦時紫栢團團如蓋大可蔽畝其鄉名紫栢鄉  
知縣雷叔聞畫圖見遺因作讚曰有赤甲丈人者居於  
青城之陽厥生在祖龍之紀歷漢及唐有客伐之鼓鐘  
鏜鏜維神保護爰及我明中懷嘉果鵠鵠來翔其葉如  
髮其幹如石東榮而西彊圍丈有八尺其高四倍臨於  
大荒以孔檜爲父以五大夫爲兄九州之內此三者  
繫其可相望

石室有二古栢見唐宋詩如裴鉶李石蘇軾等集成都

古今記中亦載之後有人請于府恐此栢壞屋欲去之  
李知幾曰屋壞尚可脩栢伐不可復併舉東坡詩蒼苔  
高朕室古栢文翁庭句爭之始得全方舟詩云嬌榮落  
盡雪霜浮偃蹇空貽社櫟蓋濡沫東家雖借潤風烟西  
爽亦宜秋皮災已覺神明露心在猶懷剪伐憂鐵鎖何  
當絆龍脚夜深雷雨卷潭湫其二云思人誰復念婆娑  
窟室崖陰未易磨四十圍間看溜雨三千年後數恒河  
不堪與世供狙杙尚許遺民占鳥窠從此便名夫子樹

康人斤斧奈予何然他日方舟有送浩姪成都學官詩  
云似聞禮殿栢久已尋斧柯則此栢亦不存矣

楊師魯集云綿竹武都山嚴仙觀雙闕內有漢時古栢  
參雲雁行而立人于蒼翠中行數百步始至栢老而中  
虛可容六人圍坐夜或有光人稱君平餌丹以餘粒埋  
栢樹下使然也

本草益州諸葛廟中大栢相傳是蜀世所植故人多采  
以作藥其味甘香異常栢也杜甫詩孔明廟前有老栢

柯如青銅根如石霜皮溜雨四十圍黛色參天二千尺  
君臣已與時際會樹木猶爲人愛惜雲來氣接巫峽長  
月出寒通雪山白憶昨路繞錦亭東先主武侯同閔宮  
崔嵬枝幹郊原古窈窕丹青戶牖空落落盤踞雖得地  
冥冥孤高多烈風扶持自是神明力正直元因造化功  
大厦如傾要梁棟萬牛回首丘山重不露文章世已驚  
未辭剪伐誰能送苦心豈免容螻蟻香葉終經宿鸞鳳  
志士幽人莫怨嗟古來材大難爲用段文昌題曰是草

木有異於草木則靈武侯祠前栢壽千齡盤根擁門勢  
如龍形含碧太空散霧虛庭合抱在於旁枝駢梢葉之  
青青百尋及於半身蓄風雷之冥冥攢柯垂陰分翠間  
明忽如虬螭向空爭行上承翔雲孤鸞時鳴下蔭芳苔  
凡草不生古色天風蒼蒼玲玲曾到靈山老栢縱橫亦  
有大者莫之與京於惟武侯佐蜀有程神其不昏表此  
爲楨斯廟斯栢實播芳馨長慶二年六月也李義山詩  
蜀相階前栢龍蛇捧閼宮陰成外江畔老向惠陵東大

樹思馮異甘棠憶召公葉凋湘鷺雨枝折海鵬風玉壘  
經綸遠金刀歷數終誰將出師表一爲問昭融陸龜蒙  
詩密葉四時同一色高枝千歲對孤峯此中疑有精靈  
在爲見盤根似卧龍

儒林公議云武侯廟前柏圍數丈唐相段文昌有詩石  
在焉唐末漸枯悴歷王孟二僞國不復生然亦不敢伐  
之宋乾德五年辛卯夏五月枯柯再榮時人異焉三國  
迄今千二百餘年矣新枝聳雲枯榦並存夭矯若虬龍

陸游劔南藁云唐有節度使取孔明祠栢一小枝以爲  
手板書於圖志非詆至今則此栢亦稱靈異著聞極矣  
宋劉望之云雙流縣保國觀古栢其大連九臂乃合較  
孔明廟中栢正一倍也異時震霆焚其一榦人以爲昔  
有伏丹其下歲久丹飛去又嘗有雙鶴棲其上因作詩  
以紀之草木長生亦偶然不須聞此便談仙燒枝競說  
丹飛日舉世寧知手種年雙鶴不歸秋自冷萬牛回首  
句空傳相逢一飲清陰下與子前生定有緣胡宗師題

雙流保國觀古栢云孔明廟前古栢奇此木氣象尤過  
之榦東髣髴煙焰起鐵龍空駕焚一枝真人丹成何所  
適世傳乘鶴冲天飛求詩道士心彌堅試聽一誦工曹  
詩

唐大中時遂州薦福院僧所植栢數十圍後唐之亂山  
林一空此栢賴寺僧以二縑逭其害賦咏甚多紹聖丙  
子李常爲令作詩曰當日雙縑值萬緡買留柯葉拂星  
辰上巢絕頂繞千鶴下憩清陰可百人見輿地紀勝

梓潼志七曲山有應夢臺臺側有栢晉時植龍首虬枝  
霜皮老幹見者即知爲千年物嘉州志凌雲山清音亭  
前有栢四株霜皮黛色其葉一則瑣細如翦一則扁平  
如片一則垂絲如柳一則蝟刺如毛異于常栢也劒門  
志縣八十里停船山有冲寂觀唐李真人於此煉丹仙  
去手植栢十八株或云以識唐十八帝有石刻乃宋乾  
德僧懷義撰

蜀都賦楔縱注云楔如松有刺縱栢葉松身

方物略竹栢生峨眉山中葉繁長而釋似竹然其幹大抵類栢而亭直贊曰葉與竹類緻理如栢以狀得名亭  
亭脩直

蜀地宜栢而不宜松即見有一二種亦新栽耳少陵覓松樹子詩落退出羣非櫟柳青青不朽豈楊梅欲存老蓋千年意爲覓霜根數寸栽又詩云四松初移時大抵三尺強別來忽三載離立如人長會看根不拔莫計枝凋傷幽色幸秀發疎柯亦昂藏所挿小藩籬本亦有隄

防終然張撥損得愧千葉黃敢爲故林主黎庶猶未康  
避賊今始歸春草滿空堂覽物歎衰謝及茲慰淒涼清  
風爲我起洒面若微霜足以送老姿聊待偃蓋張我生  
無根蒂配爾亦茫茫有情且賦詩事迹兩可忘勿矜千  
載後慘澹蟠穹蒼又詠嚴鄭公堦下新松詩弱質豈自  
負移根方爾瞻細聲聞玉帳疎翠近珠簾未見紫煙集  
虛蒙清露霑何當一百丈歆蓋擁高簷大抵蜀地松不  
能以敵栢也

蜀亦不宜于柳太白西巡歌云柳色未饒秦地綠可見  
矣然予觀三齊略記曰劉悛爲益州刺史獻蜀柳數株  
柔條甚長狀若絲縷武帝值於太昌靈和殿前常翫嗟  
之曰楊柳風流可愛似張緒梁元帝折楊柳詩曰巫山  
巫峽長垂柳復垂楊同心宜同折故人懷故鄉李商隱  
巴江柳詩巴江可惜柳柳色綠侵江其見于歎賞又如  
此

方物略云楠蜀地最宜者生童童若幢蓋然枝葉不相

礙茂葉美蔭人多植之樹甚端偉葉經歲不凋至春陳  
新相換有花實似母丁香贊曰在土所宜亭擢而上枝  
枝相避葉葉相讓繁陰可庇美幹斯仰蜀都賦曰榎楠  
幽藹又曰交讓所植注交讓木名兩樹對生一樹枯則  
一樹榮如是歲更終不俱生不俱枯也出岷山安都縣  
任昉述異記黃金山有枏木一年東榮西枯一年西榮  
東枯張華以爲交讓木宋祁曰即枏也其木直上柯葉  
不相妨陸慧曉亦謂枏是交讓顏師古曰枏與楠同

古今集記犀浦鎮有蘧仙觀爲蘧真人舊隱也有四大楠甚古陸放翁云予在成都嘗以事至沈犀過國寧觀有古楠四皆千歲木也枝掇雲漢聲挾風雨根入地不知幾百尺而陰之所庇車且百兩正晝日不穿漏夏五六月暑氣不至凜如九秋成都固多壽木然莫與四楠比予蓋愛而不能去者彌日有石刻立廡下曰是仙人蘧君手植也 文類繁江隆道觀玉帝殿庭有古楠二章分列左右如輔弼然元祐八年一夕風雷大作偃其

左偏者邑宰命匠石取之方執柯伐其枝忽聞軋軋聲  
楠乃稍稍起立匠石攀其上如猿猱然觀者驚駭邑宰  
降階伏而謝罪繁尉蒲咸臨記之甚詳

杜少陵卜居草堂一楠甚古其作詩云枏樹色冥冥江  
邊一蓋青近根開藥圃接葉製茅亭落景陰猶合微風  
韻可聽尋常絕醉困卧此片時醒又有歎枏樹爲大風  
所拔歌倚江枏樹草堂前故老相傳二百年誅茅卜居  
總爲此五月髣髴聞寒蟬東南飄風動地至江翻石走

流雲氣幹排雷雨猶力爭根斷泉源豈天意滄波老樹  
性所愛浦上童童一青蓋野客頻留懼雪霜行人不過  
聽等籟虎倒龍顛委榛棘淚痕血點垂曾臆我有新詩  
何處吟草堂自此無顏色

嚴武題巴州光福寺楠木詩楚江長流對楚寺楠木幽  
生赤崖背臨溪挿石蟠老根苔色青蒼山雨痕高枝開  
葉鳥不度半掩白雲朝與暮香殿蕭條轉密陰花龕滴  
瀝垂清露聞道偏多越水頭烟生霽斂使人愁月明忽

憶湘川夜猿叫還思鄂渚秋看君幽藹幾千丈寂寞窮  
山今遇賞亦知鐘梵報黃昏猶卧禪林戀奇響史俊和  
詩云近郭城南山寺深亭亭奇樹出禪林結根幽壑不  
知歲聳榦摩天凡幾尋翠色晚將嵐氣合月明時有夜  
猿吟經行綠葉望成蓋宴坐黃花長滿襟此木常聞生  
豫章今朝獨秀在巴鄉凌霜不肯讓松柏作宇由來稱  
棟梁會待良工時一盼應歸法水作慈航按季鷹時爲  
巴州刺史俊其客也

蔣堂清陰館種楠詩手植梗楠二千樹時當慶厯五年  
春還期莫道空歸去留得清陰與後人堂成都太守種  
楠以二千計亦可謂好事矣

異物志楠木年深向陽者凝結花紋俗呼爲鬪栢楠亦  
有蟠結如山峯者蘇老泉所作木假山即此物也梅聖  
俞詩空山枯楠大蔽牛霹靂夜落魚鳧洲魚鳧水射幾  
千秋蠹肌爛隨沙蕩流惟存堅骨蛟龍鏤形侔三峯中  
雄首左右兩峯相挾翼尊奉君長無慢尤蘇夫子見之

驚且喜買於谿叟憑貂裘因嗟大不爲棟梁又歎殘不  
爲薪櫨雨漫蘚濕得石瘦直與夫子歸隱丘東坡曰先  
君子嘗蓄木山三峯且爲之記詩人梅二丈聖俞見而  
賦之今三十年矣而猶子千乘又得五峯益奇因次聖  
俞韻使併刻于其側詩曰木生不願回萬牛願終天年  
仆沙洲時來幸逢河伯秋掀髯見怪推木流蓬萊雪嶺  
巧彫鏤蟄蟲行蟻爲豪酋阿咸大膽忽持去河伯好事  
不汝尤城中古沼浸坤軸一林瘦竹吾菟裘二頃良田

不難買三年檀木行可榦會將白髮對蒼巖魯人不厭  
東家丘樂城次韻江槎出沒浮犀牛波濤掀天谷爲洲  
江寒水落驚霜秋危根瘦節鳴寒流脆朽吹去誰鐫鏤  
連峯疊嶂立酋酋吾家此山不易得十年弃置空自尤  
猿號鶴唳豈無意委蛇怪我懷羔裘西歸父老拍手笑  
笑憶翁子躬薪榦去時三山今有五不問故園惟一丘  
蜀都賦杞櫨椅桐註引雅詩其桐其椅也劉敬叔異苑  
云晉武帝時吳郡臨平岸崩出一石鼓打之無聲以問

張華華云可取蜀中桐材刻作魚形打之則鳴於是如  
言音聞數十里華陽國志益州有梧桐木其華采如絲  
人績以爲布名曰桐華布白傳桐花詩春令有常候清  
明桐始發何此巴峽中桐花開十月豈伊物理變信是  
土宜別地氣反寒暄天時倒生殺草木堅強物所稟固  
難奪風候一參差榮枯遂乖刺况吾北人性不耐南方  
熱強羸壽夭間安得依時節以蜀中桐花開最早也

山海經單狐之山多机木郭注机似榆可燒以糞稻田

出蜀中丹鉛錄以爲即今之檜總志云檜古稱蜀木成都爲盛也酉陽雜俎蜀中有木類柞衆木榮時枯枿隆冬方萌芽布陰蜀呼爲楷木方物略云檜木民家蔭之不三年材可倍常薪疾種亟取人以爲利贊曰厥植易安數歲輒林民賴其用實代其薪不棟不梁亦被斧斤少陵憑何十一少府邕覓檜木數百栽詩草堂塹西無樹林非子誰復見幽心飽聞檜木三年大與致谿邊十畝陰自注云蜀人以檜木爲薪三年可燒也予過草堂

見檀木陰陰隔岸臨水猶可想見少陵往來行迹問他樹則不能語云嚮其利者爲有德矣

川中桑柘亦稀有惟西北飼蠶蓄之諸葛武侯表云臣家成都有桑八百株子弟衣食供給無患李膺益州記云臨津縣掌天山多柘堪爲弓雖縻絲燕角不能勝也碑目云名山縣土主神姓花乃丹稜花敬定之弟俗呼三郎廟廟有樹一榦桑一榦柘所謂壬子癸丑桑柘木也

白蠟樹似冬青而近水蜀人買蠟虫他處以清明時用  
桐葉包裹掛於枝上至孟秋則樹枝皆如綿刮而熬之  
成蠟東南州縣多有之

白樂天庭槐詩在忠州作南方饒竹樹唯有青槐稀十  
種七八死縱活亦支離何此郡庭下一株獨華滋濛濛  
碧煙葉嫋嫋黃花枝我家渭水上此樹蔭前墀忽向天  
涯見憶在故園時人生有情感遇物牽所思樹木猶復  
爾況見舊親知按通志云槐榆之植蜀土所宜錦官城

中間巷夾道而植想樂天時未入西川也

劍門之左峭巖間有異樹生石縫中大可數圍枝幹純白皆傳曰白檀樹其下常有巨虺蟠而護之民不敢採伐出玉堂閒話

韻書云黃葛木壽可千歲形如衆藤連理合而爲一大者合抱高數丈葉如橡喜緣崖生擁腫屈曲咸淳府景德觀前有古木大數十圍枝柯盤鬱如蓋山中人云此黃葛樹千年物也寰宇記羅目縣東南三十里陽山江

溉兩樹對植圍三尺二寸上引橫枝亘二丈相援連理  
陰庇百夫其名黃葛即嘉樹也蘇子由詩予生雖江陽  
未省至嘉樹指此

方物略云娑羅花生峨眉山中類枇杷數葩合房春開  
葉在表花在中根不可移故人不得爲玩贊曰聚葩共  
房葉附華外根不得徙見偉茲世范石湖峨眉行記娑  
羅樹葉如楊梅又似海桐花有紅白二色春夏間開惟  
大峨山有此今名其處爲娑羅坪黎州圖經通望縣西

一百步內有天王堂堂前有池池南有娑羅綿樹三四  
人連手合抱方匝其花盛夏方開先花而後葉謝時不  
背而墮宛轉至地花葉有綿謂之娑羅綿古老相傳云  
是肉齒和尚住持靈跡縣界有和尚山云雅安志娑羅  
花有五色如爛錦照映山谷出瓦屋山中大抵娑羅非  
名山佛地不能得也

杜甫蜀中丁香詩丁香體柔弱亂結枝猶墊細葉帶浮  
毛疎花披素艷深栽小齋後庶近幽人占晚壓蘭麝中

休懷粉身念麗春詩百草競春華麗春應最勝少須好  
顏色多漫枝條剩紛紛桃李枝處處總能移如何貴此  
重却怕有人知少陵在蜀久一草一木皆入詠可謂集  
衆芳者矣

方物略月季花即東方所謂四季花翠蔓紅蘼者蜀少  
霜雪此花得終歲十二月輒一開贊曰花亘四時月一  
披秀寒暑不改似固常守

又云錦帶花蜀山處處有之長蔓柔纖花葉間側如藻

帶然因象作名花開形似飛鳥里人亦號鬢邊嬌贊曰  
冉冉其條若不自持綠葉丹英蔓衍紛垂范石湖詩妍  
紅棠棟粧弱綠薔薇枝北風一再來飄飄隨舞衣吳下  
嫵芳檻峽中滿荒陂佳人墮空谷皎皎白駒詩蓋東南  
以錦帶爲珍峽中蔓生山谷故云

方物略錦被堆花出彭州其色一似薔薇有刺不可玩  
故俗謂薔薇爲錦被堆贊曰花跗芬侈叢刺于梗不可  
把玩艷以妍整唐裴說詩一架長條萬朶春嫩紅深綠

小窠勻只因根下千年土曾葬西川織錦人張祜詩曉  
風抹盡燕支顰夜雨催成蜀錦機當晝開時正明媚故  
鄉疑是買臣歸范成大詩誰把柔條夾砌栽壓枝萬朵  
一時開爲君也着詩收拾題作西樓錦被堆

成都古今記荼蘼花香甚可以爲酒晉山濤爲郫令以  
此花釀酒竹中所謂郫筒酒也方物略云蜀醑釀多白  
而黃者時時有之但香減于白花贊曰人情尚奇賤白  
貴黃厥英略同實寡于香宋臨邛盧申之醑釀詞云蕩

紅流水無聲暮煙細草黏天遠低回倦蝶往來忙燕芳  
期頓懶綠霧迷牆翠虬騰架雪明香暖笑依依欲挽春  
風教住還疑是相逢晚不似梅妝瘦減占人間丰神蕭  
散攀條弄蕊天涯猶記曲闌小院老去情懷酒邊風味  
有時重見對枕幃空想東牀舊夢帶將離怨右調水龍  
吟

蜀中茉莉有枝如藤而花瓣稍大盧申之詞云玉肌翠  
袖較似醺醺瘦幾度熏醒夜窻酒問炎州何許清涼塵

不到冰壺剪就晚來庭戶悄暗數流光細拾芳英黯回  
首念日暮江東偏爲魂銷人易老幽韻清標似舊正簾  
紋如水帳如烟更奈問月明露濃時候右調洞仙歌

杜甫詩梔子比衆木人間誠未多於身色有用與道氣  
傷和紅取風霜實青看雨露柯無情移得汝貴在映江  
波野人間話云蜀主昇平中嘗理花卉有青城申叟進  
花子兩顆奏云知理苑圃輒進名花以助佳趣詔賜之  
束帛出至市散帛與貧人遂不知去處已宣令內園子

種之二年枝葉婆婆則梔子樹也其花爛紅六出香襲人蜀主甚愛之或令圖入團扇或綉入衣服或以熟帛絹素鵝毛製作首飾謂之紅梔花及結實則顆大於常梔用以染素則成赭紅色甚妍翠于時珍之蜀檮杌廣政十二年十月召百官宴芳林園賞紅梔花此花青城山中進子三粒種成者六出而紅清香如梅當時最重也

檮杌云晉永廣政十二年令羅城上植芙蓉盡以幄幙

遮護九月盛開望之如錦繡謂左右曰自古以蜀爲錦城今日觀之真錦城也當時張玄作詩曰四十里城花發時錦囊高下照坤維雖粧蜀國三秋色難入幽風七月詩去年今日到成都城上芙蓉錦繡舒今日重來舊游處此花憔悴不如初預歎其不永矣

文與可二色芙蓉詩蜀國芙蓉名二色重陽前後始盈枝畫調粉筆分粧處繡引紅針間刺時落晚自憐窺露沼忍寒誰念倚霜籬主人日有西園客得爾方於勸酒

宜蓋此花初開色白已變而紅俗號之醉芙蓉也或曰  
即木蓮花方物略木蓮花生峨眉山谷狀如芙蓉香亦  
類之木榦花夏開枝條茂蔚不爲園圃所蒔贊曰葩秀  
木顛狀若芙蕖不實而榮馥馥其敷

酉陽雜俎木蓮葉似辛夷花類蓮花色相傍出忠州鳴  
玉溪邛州亦有白樂天云木蓮樹生巴峽山谷間巴民  
亦呼爲黃心樹大者高五丈涉冬不凋身如青楊有白  
文葉如桂厚大無脊花如蓮香色艷膩皆同獨房蕊有

異四月初始開自開迨謝僅二十日生忠州西北十里  
鳴玉谿者尤穠茂惜其遐僻因題三絕句如折芙蓉栽  
旱地似拋芍藥挂高枝雲堙水隔無人識唯有南賓太  
守知紅似臙脂膩如粉傷心好物不須臾山中風起無  
時節明日重來得在無已愁花落荒巖底復恨根生亂  
石間幾度欲移移不得天教拋擲在深山白傳又畫木  
蓮花圖寄元郎中詩花房膩似紅蓮朵艷色鮮如紫牡  
丹唯有詩人解親愛丹青寫出與君看老學菴云白樂

天有忠州木蓮詩予遊臨邛白鶴山寺佛殿前有兩株  
其高數丈葉堅厚如桂以中夏發花狀如芙蓉香亦酷  
似寺僧云花坼時有聲如破竹然一郡止此二株不知  
何自至也

成都古今記蕭紀僭號之歲寢殿栢柱上繞節生花如  
蓮其莖四十有六霍靡可愛識者以爲王敦之杖花明  
年紀敗年亦四十六云

揚雄蜀都賦樹以木蘭左思蜀都賦木蘭侵桂接木蘭

大樹也葉似長生冬夏榮常以冬華其實如小柿甘美  
南人以爲梅其皮可食寰宇記崇慶州產木蘭皮簡池  
志有木蘭寺以多此物也

蜀都賦注楸桂木桂也談資云蜀桂之丹者色亦甲于  
南中

白樂天喜山石榴花開作詩云忠州州裏今日花廬山  
山頭去年樹已憐根損新栽還喜花開依舊數赤玉  
何人少琴軫紅纈誰家合羅袴但知爛漫恣情開莫怕

南賓桃李妒樂天又有戲問山石榴詩小樹山榴近砌  
栽半含紅萼帶花來爭知司馬夫人妒移到庭前便不  
開又以山石榴寄元九詩山石榴一名山躑躅一名杜  
鵑花杜鵑啼時花撲撲九江三月杜鵑來一聲催得一  
枝開江城上佐閒無事山下斲得廳前栽爛漫一欄十  
八樹根株有數花無數千房萬葉一時新嫩紫殷紅鮮  
麴塵深痕裊損顰腮臉剪刀裁破紅綃巾謫仙初墮愁  
在世姪女新嫁嬌泥春日射血珠將滴地風翻火焰欲

燒人間折兩枝持在手細看不似人間有花中此物似  
西施芙蓉芍藥比嫫母奇芳絕艷別者誰通州遷客元  
拾遺拾遺初貶江陵去去時正值春山暮商山秦嶺愁  
殺人山石榴花紅夾路題詩報我何所云苦云色似石  
榴裙當時叢畔惟思我今日欄前只憶君憶君不見坐  
銷落日西風起花紛紛

酉陽雜俎山茶似海石榴蜀地有之談資云山茶有雲  
南紅石榴紅謝萬定數種芍大勝芍藥重瓣如芙蓉土

人自能接他處莫匹也寶珠雖有尚拜其下風仁壽志  
謝萬定者木匠也自雲南大理府負山茶一種歸因以  
人名花宋王覲集大慈聞海雲山茶合江梅花開遂邀  
同賞作詩野寺山茶昨夜開江亭初報一枝梅旋邀座  
上逍遙客同醉花前潋灩盃秀色霜濃方潤澤暗香風  
靜更徘徊仙姿莫遣常情妒不帶東山伎女來胡宗師  
和云錦水黃金密印開東南時望滯鹽梅得隨劒外同  
爲客幸逐花前醉倒盃白玉藥高枝瘦碧隰脂萼嫩葉

低徊綺羅不識清詩骨須趁春風摸石來劉缺和云百  
卉嚴寒未放開山茶映發蜀江梅解顏況有花經眼取  
醉寧辭酒滿盃照日亂紅光爛漫漾流輕素影徘徊罇  
前已得春消息不待江南驛使來徐彥孚和云萬藥山  
茶傍臘開一番春信入江梅追游共按黃金轡縱賞還  
傾白玉盃濃艷迎風香斷續疎枝橫月影徘徊隼旟不  
負登臨興更約攜朋載酒來吳師孟和云何處珍叢最  
早開海雲山茗合江梅忽傳詩帥邀膚使不用歌姬侍

宴盃曉艷鮮明供綺靡晚粧清淡奉徘徊此時文酒風  
流事豈似臨江放蕩來宋蒲瀛次袁升之遊海雲寺鴻  
慶院賞山茶之什六首山茶兩本上連空疊葉棲枝占  
佛宮雀尾有金輪紺碧鶴頭無火讓殷紅優於峽茗稱  
呼異劣與梅花氣候同誰識諸天雨花外道人宴坐雪  
霜中其二年花葉炫虛空歲月循環十二宮對植霜  
天無賴碧特開金地可憐紅長春比並何妨別密雪交  
加有底同不必傳神呼趙老君詩元在典刑中其三花

開似火半燒空  
熒惑飛來失故宮  
但見洛人誇魏紫  
誰知蜀國產真紅  
肯隨月季無時節  
應怪梅花有異同  
遠挈一罇誰伴我  
還從山裏望城中  
其四對境那能問  
色空山茶花發映  
蓮宮攻餘瑟瑟風  
搖綠刑盡猩猩日  
曬紅大雪迷漫元  
斗異千林搖落不  
雷同何須誑汝老  
迦葉分付闍黎一  
笑中其五臘月寒  
冰火滿空玄冥移  
種祝融宮雪霜底  
事論堅白兒女何  
知愛軟紅金鼎轉  
丹應有異玉沙洗  
水若爲同細思造  
物元無物顛倒繁  
華

掌握中其六花發今年喜不空遨頭肅客上蕭宮雪殘  
千丈猶連白風引雙旌欲鬪紅他日勲名三事在先春  
和氣萬家同等閒草木蒙前被況入尋常顧盼中范石  
湖十二月十日賞海雲山茶詩門巷驩呼十里村臘前  
風物已如春多年池上經行處萬里天邊未去人客鬢  
花身俱歲晚妝光酒色且時新海雲橋下溪如鏡休把  
冠巾照路塵

蜀都賦梳桃函列爾雅曰梳山桃也劉禹錫竹枝詞山

桃紅花滿上頭蜀江春水拍山流花紅易衰似郎意水  
流無限似儂愁少陵於蕭八明府寔處覓桃栽詩奉乞  
桃栽一百根春前爲送浣花村河陽縣裏雖無數濯錦  
江邊未滿園白傳種桃杏詩大抵心安即是家年深兼  
欲忘京華忠州且作三年計種杏栽桃擬待花又寄題  
忠州小樓桃花詩再遊巫峽知何日總是秦人說向誰  
長憶小樓風月夜紅欄干外兩三枝予于錦官署中得  
一種桃花白而重臺者微露紅色若繪事然此海內所

無也

放翁云歐陽公梅宛陵王文恭集皆有小桃詩歐詩雪裏花間人未知摘來相顧共驚疑便當索酒花前醉初見今年第一枝初但謂桃花有一種早開者耳及遊成都始識所謂小桃者上元前後即看花狀如垂絲海棠曾子固雜識云正月二十開天章閣賞小桃正謂此也蜀都賦云朱櫻春熟杜甫野人送櫻桃詩西蜀櫻桃也自紅野人相贈滿筠籠數回細寫愁仍破萬顆勻圓訝

許同憶昨賜霑門下省退朝擎出大明宮金盤玉筋無  
消息此日嘗新任轉蓬白樂天題東樓前李使君所種  
櫻桃詩身入青雲無見日手栽紅樹又逢春唯留花向  
樓前看故故拋愁與後人宋何耕曰余承乏成都郡丞  
官居舫齋之東有櫻樹焉本大實小其熟猥多鮮紅可  
愛而苦不可食雖鳥雀亦弃之感而賦之云始余至於  
官居盼茲樹之特奇榦擁腫以上達條扶疎而下披蔭  
露井其有餘知封植之幾時或告余以含桃出饒涎而

流頤意薦廟之珍果必甘滋之若飴幸一熟之得嘗指  
麥秋以爲期忽春事之已晚訝子結之獨遲初瑣碎以  
破蕾漸毓稠而着枝聊攀摘以適口乃苦澁而顰眉類  
置膽於越國異茹薺於周詩謝芳液之津津空殷紅之  
累累累誤來集之衆鳥誑無知之羣兒感人事之大謬爲  
累欬而齎咨或名美而實非或表盛而裏虧或色厲而  
內荏或迹公而情私驚翰假於鳳鳴羊質混於虎皮佞  
似聖以疇測姦託儒而莫窺莽恭儉以竊國外博辯以

僵尸談仁義其可樂視所履而舛馳儼衣冠於民上爲  
賈豎之不爲方滔滔以皆是奚一木之足悲

本草醋林子生邛州山箐中木高丈餘枝葉繁茂三月  
開白花九月十月子熟累累數十枝成朶生青熟赤略  
類櫻桃而蒂短熟時采之陰乾連核用土人以鹽醋收  
藏充果食

杜少陵詣徐卿覓果子栽詩草堂少花今欲栽不問綠  
李與黃梅石笋街中却歸去果園坊裏爲求來白樂天

嘉慶李詩東都綠李萬州栽君手封題我手開把得欲  
嘗先悵望與渠同別故鄉來蜀都賦云荅還離支張揖  
曰荅還似李出蜀也

蜀都賦有扶林檎註林檎實似赤柰而小味如梨梁庾  
肩吾謝賚林檎啓曰丹徒故苑歲綿長而不見峩山雖  
植路重阻而來難未有徙核圓丘移根閬坂仙厨始摘  
猶青玉之盤下賤爰頒遂八柚之座

洞冥記云蜀都素柰以夏成梁褚潛柰詩曰成都貴素

質酒泉稱白麗紅紫奪夏藻芬芳掩春蕙映日照新芳  
叢林抽晚蕒誰謂種三珠終焉競八桂不讓圓丘中  
潔華庭際

宋祁方物略北方葡萄熟則色紫蜀有綠葡萄熟時其  
色正綠贊曰西南所宜柔蔓紛衍縹穗綠實其甘可薦  
蜀都賦云紫梨津潤洞冥記曰塗山之背梨大如升色  
紫千年一花亦曰紫輕梨矣梁沈約應詔詠曰大谷來  
既重岷山道有難摧折非所羞但令入玉盤劉孝綽應

令詠曰玉壘稱津潤金谷詠芳菲詎匹龍樓下素葉映  
華扉後梁宣帝詩曰大谷常流稱南荒本足珍綠葉已  
承露紫實復含津齊謝朓謝隋王賜梨啟曰味出靈關  
之陰旨介玉津之溼豈徒真定歸美大谷慚滋已上四  
作皆本左思紫梨津潤之一言也塗山岷山玉壘靈關  
玉津皆蜀地

普慈志縣介萬山間無土地肥饒之產舟車貨利之聚  
惟鐵山棗宗龕梨天池藕三者皆陳希夷所種遂寧志

宋初遂州栢子鎮龐君厚者與陳希夷善一日訪之華山希夷餉以梨龐乞一種歸植之因蕃衍得名方輿云廣安軍梨有數種入口即化者爲上世謂廣安有十似梨似耿其一也范蜀公詩白巖霜重紅梨曉注曰白巖梨比鳳栖差小而其味過之陸游入蜀記云巫山縣大溪口出美梨大如升

張世南游宦紀聞楹棹大者如梨味甜而香用刀切則味損而黑凡食時先以巾拭去毛以巾包於柱上擊碎

其味甚佳蜀中有之

韻寶云檄芳無切檄檻木名生蜀山中子有鹽如霜漬  
中名鹽霜果 方物略天仙果樹高八九尺無花葉似  
荔枝而小子如櫻桃累累綴枝間六七月熟味至甘贊  
曰有子孫枝不鷺而實薄言采之味埒蜂蜜

丹鉛錄優曇鉢花似枇杷無花而實即蜀中無花果也  
蜀都賦林檎枇杷注枇杷冬花黃實本出蜀中王建贈  
薛濤詩萬里橋邊女校書枇杷樹裏閉門居掃眉才子

知多少管領春風總不如白傅山枇杷花詩萬重青嶂  
蜀門口一樹紅花山頂頭春盡憶家歸未得低紅如解  
替君愁文彥博枇杷詩有果產西裔作花凌早寒樹繁  
碧玉葉柯疊黃金丸上都不可寄咀味獨長嘆然蜀中  
枇杷不能佳若比閩中猶太白之于月耳

蜀都賦有櫟栗罅發藝文類聚梁州獻栗徑寸半方物  
略天師栗生青城山中他處無有也似栗味美惟獨房  
爲異久食已風攣贊曰栗類尤衆此特殊味專蓬若橡

託神以貴青城志上清宮在丈人祠之側晉朝立宮于  
上夜則神燈遍空其東北麓有天師手植栗十七株文  
同詩天師攜此種至自上饒遠當時十七樹高幹倚孤  
巘蒼蓬蔕藜藜大紫殼檳榔軟蜀部名果中推之爲上選  
綿州神泉縣出榛子亦能改竈所云八子之數

方物略云餘甘子生戎瀘山中樹大葉細似槐實若李  
而小咀之前苦後歆歆有味故號爲餘甘核有稜或六  
或七解硫黃毒即本草所謂菴摩勒也贊曰黃葩翠葉

圓實而澤咀久還甘或號菴勒癸辛雜誌云涪翁在戎  
州日過蔡次律家小軒外植餘甘子乞名於翁因名之  
曰味諫軒其後王子予以橄欖送翁翁賦云方懷味諫  
軒中果忽見金盤橄欖來想見餘甘有瓜葛苦中真味  
晚方回然則二物亦可名之爲諫果也山谷與人書云  
餘甘乃有一種大者如李其質味甘脆與常見者絕不  
類或云蠻中有之西域傳云餘甘二種大者生青熟黃  
小者始終青色蓋信然矣

華陽國志犍爲南安縣有柑橘官社廣志曰甘有二十  
一種成都平蒂甘大如升色蒼黃酉陽雜俎天寶十載  
上謂宰臣曰近日於宮內種柑子數株今秋結實百五  
十顆與江南蜀道所進不異大唐新語益州每歲進柑  
子皆以紙裹之他時長吏嫌紙不敬代以細布旣而恐  
柑子爲布所損每懷憂懼俄有御史甘子布使於蜀驛  
使馳白長吏有御史甘子布至長吏以爲推布裹柑子  
事懼曰果爲所推及子布到驛長吏但序以布裹柑子


爲敬子布初不之知久而方悟聞者莫不大笑方物略  
柑生果渠嘉等州結實瑋于江南味亦差薄贊曰碧葉  
素葩厥包之珍丹衷既披香液飴津

晉張載詩三巴黃甘瓜州素柰渴者所思銘之裳帶唐  
杜甫詩春日清江岸千柑二頃園青雲著葉密白雪避  
衣繁結子隨邊使開筒近至尊後於桃李熟終得獻金  
門薛濤酬郭簡州寄柑子詩霜規不讓黃金色圓質仍  
含御史香何處同聲情最異臨川太守謝家郎宋夔守

王十朋謝趙果州元旦遺黃柑金泉酒詩曰元日書來自  
果州柑三百顆酒新筍賢於齊下六從事好似平陽千  
戶侯老矣惟思醉鄉去歸與且種木奴休使君厚意吾  
先辱媿乏瓊瑤報所投

史記蜀漢江陵千樹橘其人與千戶侯等蜀都賦戶有  
橘柚之園注大曰柚小曰橘犍爲南安縣出地理記曰  
蜀郡嚴道巴東郡朐腮魚復二縣出橘有橘官傳異七  
誨有巫山朱橘周李元操園中雜詠橘詩曰嘉樹出巫

陰分根徙上林白華如霰雪朱實似懸金布影臨丹地  
飛香度玉岑自有凌冬質能守歲寒心文選盧橘夏熟  
郭璞註曰今蜀中有給客橙似橘而非若柚而芬香冬  
夏華實相繼或如彈丸或如拳通歲食之即盧橘也



蜀中廣記卷六十一